

MESYUARAT KEDUA, PENGGAL KETIGA
PARLIMEN KEEMPAT BELAS
2020

HARI ISNIN : 27 JULAI 2020

JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 11 HINGGA NO. 69)

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN AHMAD TARMIZI BIN SULAIMAN [SIK]

TARIKH : 27 JULAI 2020 (ISNIN)

SOALAN

TUAN AHMAD TARMIZI BIN SULAIMAN [SIK] minta **MENTERI PEMBANGUNAN WANITA, KELUARGA DAN MASYARAKAT** menyatakan statistik terkini penerima bantuan JKM di Malaysia di Negeri Kedah umumnya Daerah Sik khususnya serta langkah semakan untuk kenaikan sumbangan bantuan setiap kategori.

JAWAPAN

Tuan Yang di-Pertua,

Berdasarkan statistik jabatan, jumlah penerima bantuan Jabatan Kebajikan Masyarakat (JKM) dari Januari hingga Jun 2020 ialah seramai 489,773 penerima di seluruh negara dengan peruntukan yang telah disalurkan adalah sebanyak RM899 juta. Manakala penerima bantuan JKM bagi negeri Kedah adalah seramai 42,221 penerima dengan peruntukan yang telah disalurkan adalah sebanyak RM80 juta. Manakala bagi Daerah Sik khususnya penerima bantuan adalah seramai 3,366 penerima dengan peruntukan sebanyak RM11.7 juta.

Tuan Yang di-Pertua,

Kementerian Pembangunan Wanita, Keluarga dan Masyarakat (KPWK) sentiasa menyemak kadar bantuan mengikut skim bagi memastikan kadar bantuan yang diterima adalah bersesuaian dari semasa ke semasa. Kenaikan kadar bantuan yang terakhir adalah pada bulan Januari tahun 2018 melibatkan skim berikut:

SOALAN NO : 11

Bantuan Orang Tua (BOT) sebelum ini adalah RM300 sebulan telah dinaikkan kepada RM350 sebulan.

Elaun Pekerja Cacat (EPC) sebelum ini adalah RM350 sebulan telah dinaikkan kepada RM400 sebulan.

Bantuan Orang Kurang Upaya Tidak Berupaya Bekerja (BTB) sebelum ini adalah RM200 sebulan telah dinaikkan kepada RM250 sebulan.

Bantuan Penjagaan Orang Kurang Upaya Terlantar/ Pesakit Kronik Terlantar (BPT) sebelum ini adalah RM300 sebulan telah dinaikkan kepada RM350 sebulan.

KPWKM melalui JKM telah menyediakan bantuan kewangan kebajikan untuk meringankan beban kumpulan sasar buat sementara waktu sehingga kumpulan sasar ini mampu untuk keluar daripada kepompong kemiskinan dan mampu ke arah hidup berdikari. Ini adalah kerana, bantuan kebajikan yang diberikan adalah bukan untuk menampung kos sara hidup sepenuhnya sebaliknya ia adalah untuk membantu meringankan beban kewangan yang dialami oleh kumpulan sasar untuk hidup yang lebih selesa dan sempurna.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHAN MING KAI [ALOR SETAR]

TARIKH : 27 JULAI 2020

SOALAN

Minta **MENTERI PERTANIAN DAN INDUSTRI MAKANAN** menyatakan adakah peladang bukan Melayu layak menjadi ahli Pertubuhan Peladang Kawasan (PPK) dan adakah pemilikan hartanah rizab Melayu oleh sesuatu PPK boleh dijadikan alasan untuk menolak kemasukan ahli bukan Melayu.

JAWAPAN

Tuan Yang Dipertua,

1. Untuk makluman, peladang bukan Melayu adalah layak untuk menjadi ahli Pertubuhan Peladang Kawasan (PPK). Hal ini jelas dinyatakan dalam Perkara 10(i) Perlembagaan PPK yang menyatakan kelayakan untuk menjadi anggota PPK iaitu:

Orang-orang perseorangan yang mempunyai kelayakan yang berikut bolehlah menjadi anggota Pertubuhan ini -

- (a) seseorang warganegara Malaysia yang telah mencapai umur 18 tahun dan tinggal dalam kawasan pengendalian Pertubuhan ini; dan*
- (b) mengambil bahagian dalam pengeluaran pertanian dan ternakan; atau*
- (c) mendapat pendapatan dari pengeluaran pertanian dan ternakan; atau*
- (d) menguasai mana-mana daripada faktor-faktor pengeluaran pertanian dan ternakan.*

Jelas, tiada syarat didalam Perkara 10(i) Perlembagaan PPK yang menghalang bukan Melayu menjadi ahli PPK.

2. Manakala berkenaan isu pemilikan hartanah rizab Melayu, setiap negeri mempunyai undang-undang tersendiri yang diperuntukkan melalui Enakmen Rizab Melayu masing-masing yang mengandungi syarat ataupun sekatan yang berbeza mengikut negeri masing-masing dan ianya di bawah bidang kuasa Kerajaan Negeri berdasarkan Jadual Kesembilan Perlembagaan Persekutuan. Dalam hal ini, urusan pemilikan hartanah Rizab Melayu adalah urusan di antara Kerajaan Negeri dan PPK sahaja.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DATO' SRI HASSAN BIN ARIFIN [ROMPIN]

TARIKH : 27 JULAI 2020 (ISNIN)

SOALAN

Minta **MENTERI PENGAJIAN TINGGI** menyatakan berapa jumlah majikan yang telah mengambil bahagian dalam insentif pengecualian cukai bagi majikan yang membantu pembayaran hutang PTPTN pekerja dan apakah langkah pihak Kementerian untuk menggalakkan lebih banyak lagi majikan yang mengambil bahagian di dalam insentif ini.

JAWAPAN

Tuan Yang di-Pertua,

Di dalam pembentangan Belanjawan 2019, kerajaan telah memperkenalkan insentif pelepasan cukai kepada majikan yang membantu menyelesaikan baki pinjaman PTPTN pekerja mereka. Di bawah insentif ini, jumlah baki pinjaman PTPTN yang dijelaskan oleh majikan akan diambilkira sebagai sebahagian daripada perbelanjaan yang akan mengurangkan pendapatan bercukai syarikat. Dalam konteks ini, majikan tidak boleh mengenakan apa-apa syarat kepada pekerja mereka sebagai balasan kepada pembayaran baki hutang PTPTN yang telah dijelaskan.

Sehingga Jun 2020, sejumlah 30 majikan telah mengambil bahagian dalam insentif ini dengan bayaran balik yang diterima oleh PTPTN adalah sebanyak RM451,536.34.

PTPTN secara berterusan mengadakan promosi serta penerangan berkenaan insentif ini. Bagi memberi peluang kepada lebih banyak majikan mendapat manfaat daripada insentif ini, Kerajaan telah meneruskan pelaksanaan insentif ini sehingga tahun 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN SIM TZE TZIN [BAYAN BARU]

TARIKH : 27 JULAI 2020 (ISNIN)

SOALAN

Minta MENTERI PENGANGKUTAN menyatakan status projek pembesaran Lapangan Terbang Antarabangsa Pulau Pinang sama ada ia akan terus dilaksanakan akibat COVID-19.

JAWAPAN

Yang di-Pertua,

Untuk makluman Yang Berhormat, sektor pelancongan dan penerbangan adalah antara industri paling terjejas susulan impak COVID-19. Ianya telah menyebabkan ketidaktentuan pasaran yang meningkatkan lagi risiko sedia ada yang membebankan industri penerbangan. Kesan penularan wabak COVID-19 terhadap ekonomi dunia dan negara, terutamanya aspek perubahan corak permintaan pelancong dan sektor penerbangan yang memerlukan satu tempoh pemulihan yang dijangka memakan masa di antara 2 hingga 3 tahun lagi.

Dalam hubungan ini, Kementerian Pengangkutan akan melaksanakan Kajian National Airport Strategic Plan (NASP) yang meliputi kajian semua pembangunan lapangan-lapangan terbang dan Short Take-Off Landing Airport (STOLport) dalam negara yang dijangka siap pada tahun 2023 selaras dengan Dasar Pengangkutan Negara. Kajian ini bertujuan menentukan hala tuju pembangunan lapangan-lapangan terbang di Malaysia dari segi peranannya, keperluan ruang udara (airspace requirement), kajian ekonomi dan strategik agar pembangunan sesebuah lapangan terbang itu dilaksanakan berdasarkan kepada keperluan sebenar seperti mana dapatan kajian tersebut.

Oleh yang demikian, sebarang cadangan pembangunan lapangan terbang baharu termasuk cadangan pembangunan dan menaik taraf Lapangan Terbang Antarabangsa Pulau Pinang akan hanya dapat dipertimbangkan selepas kajian NASP dimuktamadkan oleh Kerajaan. Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK ZAKARIA BIN MOHD EDRIS
@ TUBAU [LIBARAN]**

TARIKH : 27 JULAI 2020 (ISNIN)

SOALAN

DATUK ZAKARIA BIN MOHD EDRIS @ TUBAU [LIBARAN] minta
**MENTERI PEMBANGUNAN WANITA, KELUARGA DAN
MASYARAKAT** menyatakan:

- a) Statistik kes keganasan rumah tangga dan seksual sepanjang pelaksanaan PKP, mengikut jantina, umur dan negeri; dan
- b) Tindakan yang telah diambil oleh Kementerian terhadap suspek Keganasan dan jenis bantuan yang dihulurkan kepada mangsa dan keluarga.

JAWAPAN

Tuan Yang di-Pertua,

Bagi menangani isu keganasan rumah tangga, Kementerian Pembangunan Wanita, Keluarga dan Masyarakat (KPWKM) mengambil tindakan di bawah Akta Keganasan Rumah Tangga 1994 [Akta 521]. Menerusi akta ini, Kerajaan memperuntukkan perlindungan undang-undang dalam situasi keganasan rumah tangga dan perkara-perkara yang bersampingan dengannya. Tindakan segera akan dijalankan bersama agensi-agensi penguatkuasaan seperti Polis Diraja Malaysia (PDRM), mahkamah dan agensi yang berkaitan bagi memastikan segala bentuk keganasan rumah tangga dapat dibendung.

- a) Berdasarkan statistik Jabatan Kebajikan Masyarakat (JKM), semenjak pelaksanaan Perintah Kawalan Pergerakan (PKP) 1 hingga PKP 4 bermula 18 Mac hingga 12 Mei 2020, sebanyak 190 kes aduan mengenai keganasan rumah tangga termasuk seksual telah dilayan oleh JKM di seluruh negara. Daripada jumlah tersebut 9 kes adalah lelaki dan 181 kes adalah perempuan. Pecahan kes mengikut umur adalah seperti berikut iaitu:
- i. seorang (1) kanak-kanak berumur antara 7-12 tahun;
 - ii. 160 kes berumur antara 18-45 tahun;
 - iii. 26 kes adalah berumur antara 46 -74 tahun; dan
 - iv. 3 kes berumur 75 tahun ke atas.

Pecahan kes mengikut negeri adalah seperti berikut:

Bil.	Negeri	Jumlah
1.	Selangor	70 kes
2.	Johor	21 kes
3.	Wilayah Persekutuan Kuala Lumpur	20 kes
4.	Pulau Pinang	15 kes
5.	Pahang	13 kes
6.	Perak	12 kes
7.	Kedah	11 kes
8.	Negeri Sembilan	8 kes

Bil.	Negeri	Jumlah
9.	Sabah	8 kes
10.	Kelantan	5 kes
11.	Terengganu	3 kes
12.	Melaka	3 kes
13.	Sarawak	1 kes
14.	Perlis	Tiada kes
15.	Wilayah Persekutuan Labuan	Tiada kes

- b) Tindakan yang diambil kepada suspek melibatkan dua (2) agensi iaitu Polis Diraja Malaysia (PDRM) berdasarkan bidang kuasa di bawah PDRM serta JKM berdasarkan Akta 521 iaitu melaksanakan program pemulihan bawah Seksyen 11, iaitu sekiranya Mahkamah dalam Perintah Perlindungan (PO) yang telah dikeluarkan kepada mangsa telah memerintahkan suspek menjalani program pemulihan.

Antara bantuan yang diberikan kepada mangsa dan keluarga pula adalah seperti berikut:

1. Perintah Perlindungan Kecemasan;
2. Membantu mendapatkan Perintah Perlindungan Interim daripada Mahkamah;
3. Membantu mendapatkan Perintah Perlindungan daripada Mahkamah;
4. Memberi perlindungan sementara di Tempat Selamat;
5. Memberi kaunseling dan perkhidmatan tele-kaunseling;
6. Memberi khidmat nasihat berkaitan Akta Keganasan Rumah Tangga 1994; dan
7. Dirujuk ke agensi untuk bantuan sokongan lain.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG KAH WOH [IPOH TIMUR]

TARIKH : 27 JULAI 2020 (ISNIN)

SOALAN

Minta **MENTERI PENDIDIKAN** menyatakan jumlah peruntukan Kerajaan yang telah disalurkan kepada sekolah-sekolah SMK, SMJK, SK, SJK(C), SJK(T), SUWA, SAR dari 1 Mac 2020 sehingga sekarang.

JAWAPAN

Tuan Yang di-Pertua,

Kementerian Pendidikan Malaysia (KPM) telah menyalurkan peruntukan sebanyak RM660.2 juta pada bulan Januari dan Februari 2020 untuk penyelenggaraan 6,507 buah sekolah di seluruh negara di bawah Program Khusus Penyelenggaraan Institusi Pendidikan. Perincian penyaluran peruntukan tersebut adalah seperti berikut:

Bil.	Jenis Sekolah	Peruntukan (RM juta)	Bilangan Sekolah
1.	Sekolah Kebangsaan dan Sekolah Menengah Kebangsaan	355.1	4,012
2.	Sekolah Jenis Kebangsaan Cina	43.8	437
3.	Sekolah Jenis Kebangsaan Tamil	18.7	213
4.	Sekolah Berasrama Penuh	50.0	69
5.	Institusi Pendidikan lain seperti Institut Pendidikan Guru Malaysia, Institut Aminuddin Baki, Kolej	192.6	1,776

Bil.	Jenis Sekolah	Peruntukan (RM juta)	Bilangan Sekolah
	Matrikulasi, Pusat Kegiatan Guru, Pusat Ko-Kurikulum dan Kuarters Pendidikan		
JUMLAH		660.2	6,507

Daripada jumlah peruntukan yang disalurkan ini, KPM sedang membuat penjajaran semula peruntukan yang masih belum dibelanjakan bagi memastikan keutamaan diberikan kepada kerja-kerja penyelenggaraan yang kritikal.

Sementara itu, baki peruntukan Program Khusus Penyelenggaraan Institusi Pendidikan bagi tahun 2020 sebanyak RM136.8 juta kini sedang dalam proses untuk disalurkan kepada sekolah-sekolah yang terlibat.

Di samping itu, KPM juga menerima sejumlah RM410 juta peruntukan di bawah Pakej Rangsangan Ekonomi 2020. Peruntukan tersebut adalah bagi kerja-kerja menaik taraf, baik pulih dan selenggara kemudahan di sekolah. Kesemua peruntukan ini telah disalurkan ke Jabatan Pendidikan Negeri dan Pejabat Pendidikan Daerah pada bulan April 2020.

KPM sentiasa prihatin dan akan terus memberi perhatian kepada keperluan penyelenggaraan fasiliti bangunan dan kemudahan di sekolah. Ini adalah penting untuk membolehkan murid dapat mengikuti pengajaran dan pembelajaran dalam keadaan selamat, kondusif dan selesa.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS TAHUN 2020**

PERTANYAAN : LISAN

DARIPADA : TUAN SABRI BIN AZIT [JERAI]

TARIKH : 27 JULAI 2020 (ISNIN)

SOALAN

TUAN SABRI BIN AZIT [JERAI] minta **MENTERI PERTANIAN DAN INDUSTRI MAKANAN** menyatakan dasar dan hala tuju negara dalam menangani isu berkaitan keselamatan makanan sebagai langkah persediaan Malaysia ketika mana berhadapan dengan wabak seperti COVID-19.

JAWAPAN

Tuan Yang Dipertua,

1. Kementerian Pertanian dan Industri Makanan (MAFI) berperanan dalam memastikan bekalan makanan negara kekal terjamin dalam apa jua keadaan. Dalam hal ini, Kementerian akan terus menggiatkan usaha bagi meningkatkan tahap pengeluaran makanan negara dengan menjuruskan kestabilan dan kelangsungan rantai bekalan makanan sebagai langkah persediaan ketika menghadapi krisis seperti wabak COVID-19.
2. Dasar dan hala tuju negara dalam menangani isu berkaitan keselamatan makanan (*food security*) seperti pengeluaran, rantai bekalan, pemasaran, tenaga kerja dan perubahan iklim bagi menghadapi wabak seperti COVID-19 adalah seperti berikut:

- i. Merancang aktiviti pengeluaran makanan dengan pemberian subsidi / insentif input dan penyediaan khidmat nasihat teknikal;
- ii. Meningkatkan keberkesanan pengeluaran dengan menambahbaik infrastruktur dan kemudahan seperti jalan dan fasiliti ladang, pengaliran dan saliran kawasan sawah padi serta kompleks dan jeti pendaratan ikan;
- iii. Meningkatkan kecekapan rantai bekalan dan logistik melalui kemudahan pusat pengumpulan, penyimpanan, pemprosesan dan pengedaran;
- iv. Memperluas akses pasaran pengusaha tani melalui outlet pemasaran seperti pasar tani, pasar nelayan, Agrobazaar dan MyFarmOutlet serta menggalakkan penyertaan usahawan dalam platform e-dagang seperti Agrobazaar Online, NEKMATBIZ dan platform kerjasama strategik dengan pihak swasta seperti Lazada dan Shoppe;
- v. Melahirkan tenaga kerja yang kompeten dan berdaya saing melalui Program Latihan Kemahiran Pertanian Kebangsaan;
- vi. Meremajakan sektor pertanian dengan menggalakkan penyertaan golongan muda melalui Program Agropreneur Muda dengan geran *in-kind* dan skim pembiayaan serta latihan teknikal;
- vii. Menggalakkan aplikasi teknologi moden seperti fertigasi, kilang tanaman, penggunaan dron, sistem pertanian pintar, *artificial intelligence* (AI), *big data* dan *internet of things* (IoT); dan
- viii. Melaksanakan aktiviti penyelidikan dan pembangunan (R&D) berkaitan input pertanian seperti benih dan baka yang mempunyai daya tahan dan kerintangan yang tinggi kepada cuaca melampau dan racun perosak.

3. Kesemua dasar dan hala tuju tersebut seperti di atas akan diterapkan dan diperkasakan dalam Dasar Agromakanan Negara 2.0 (DAN 2.0) (2021-2030) dan Rancangan Malaysia Kedua Belas (RMK-12) (2021-2025) yang bakal dilancarkan pada tahun 2021.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB PUAN NURUL IZZAH BINTI ANWAR
[PERMATANG PAUH]**

TARIKH : 27 JULAI 2020 (ISNIN)

SOALAN

PUAN NURUL IZZAH BINTI ANWAR [PERMATANG PAUH] minta
MENTERI KOMUNIKASI DAN MULTIMEDIA menyatakan :-

- a) status terkini Pelan Gentian Optik dan Kesalinghubungan Negara 1 selari dengan rancangan menjamin kelajuan internet sekurang-kurangnya 30 Mbps kepada 98% rakyat Malaysia; dan
- b) perancangan Kementerian membuka akses 'Coverage Mapping' buat capaian umum dalam usaha meningkatkan ketelusan data capaian internet.

JAWAPAN

Tuan Yang di-Pertua,

1. Untuk makluman Ahli Yang Berhormat, pada masa ini pelaksanaan Pelan Gentian Optik dan Kesalinghubungan Negara 1 (NFCP 1) adalah diperingkat perolehan tapak dan mendapatkan kelulusan Pihak Berkuasa Tempatan (PBT). Ianya melibatkan proses pemerolehan bagi 152 tapak di lapan negeri di 93 mukim. Perkara ini telah mengambil sedikit masa akibat penularan wabak Covid-19 dan pematuhan kepada penguatkuasaan Perintah Kawalan Pergerakan

(PKP) serta keutamaan kepada keselamatan pekerja dan masyarakat tempatan. Pembinaan menara komunikasi di 147 tapak dijangka siap dalam suku pertama 2021 manakala selebihnya dijangka siap pada Februari 2022 memandangkan lokasinya yang agak jauh di pedalaman.

2. Selanjutnya, sesi perancangan akan diadakan bersama pihak industri untuk memantapkan kualiti dan liputan perkhidmatan di seluruh negara bagi memastikan semua kawasan yang berpenduduk mendapat liputan yang secukupnya. Antara perkara yang akan dibincangkan termasuklah pemetaan liputan jalur lebar talian tetap dan mudah alih.

3. Walau bagaimanapun, usaha bagi meningkatkan liputan dan kualiti perkhidmatan jalur lebar di seluruh negara terutamanya di kawasan luar bandar dan pedalaman bukan sahaja melibatkan kerajaan persekutuan malah memerlukan kerjasama pelbagai pihak, termasuk di peringkat kerajaan negeri dan pihak berkuasa tempatan untuk pemudahcaraan proses-proses perolehan dan kelulusan tapak yang terlibat. Versi yang boleh di akses oleh orang awam dijangka akan disediakan menjelang suku pertama 2021.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SERI HAJI IDRIS BIN JUSOH
[BESUT]**

TARIKH : 27 JULAI 2020 (ISNIN)

SOALAN

Minta **MENTERI PENGANGKUTAN** menyatakan status terkini projek Laluan Rel Pantai Timur (ECRL) dan senaraikan Rancangan Lembaga Kemajuan Tanah Persekutuan (FELDA) yang terlibat dalam projek ECRL ini.

JAWAPAN

Yang di-Pertua,

Untuk makluman Yang Berhormat, pada masa ini, kerja-kerja pembinaan sedang giat dijalankan dengan tumpuan kerja-kerja pembinaan tertentu di jajaran Seksyen B dari Dungun, Terengganu sehingga ke Mentakab, Pahang. Di antara kerja-kerja pembinaan tersebut adalah kerja-kerja pengorekan dan pembinaan terowong di terowong Dungun, terowong Paka dan terowong Kuantan. Disamping itu juga, kerja-kerja awalan di terowong-terowong lain juga telah bermula seperti di terowong Gambang, terowong Sri Jaya, terowong Gedung Siam dan juga terowong Paya Pasir yang kesemuanya terletak di negeri Pahang.

Bagi tahun 2020, dianggarkan sebanyak 101 lokasi-lokasi kerja yang dirancang akan bermula di sepanjang jajaran Seksyen A dan juga Seksyen B. Bagi Seksyen C jajaran dari Mentakab, Pahang sehingga ke

Pelabuhan Klang, Selangor pula, Kerajaan sedang di dalam proses memuktamadkan jajaran ini. Sehingga bulan Jun 2020, kemajuan projek ECRL berada pada tahap 16 peratus dengan mengambil kira kerja-kerja awalan dan pra-pembinaan yang turut merangkumi kerja reka bentuk dan perolehan.

Pihak Malaysia Rail Link Sdn. Bhd. (MRL) sebagai pemilik projek ECRL telah mendapat kelulusan skim keretapi bagi jajaran Seksyen A dari Kota Bharu, Kelantan ke Dungun, Terengganu pada 14 Mei 2020. Selain itu, kelulusan Kajian Impak Alam Sekitar (EIA) telah diterima pada 13 Mac 2020 dan juga Kajian Impak Warisan (HIA) pada 12 Mac 2020 bagi jajaran ini.

Untuk makluman Yang Berhormat juga, laluan projek ECRL akan melalui tanah Lembaga Kemajuan Tanah Persekutuan (FELDA). Bagi jajaran Seksyen A (Kota Bharu - Dungun), sebanyak 210 lot tanah FELDA yang telah dikenalpasti di Terengganu dan kawasan yang terlibat adalah Felda Selasih, Felda Chalok dan Felda Chalok Barat. Bagi jajaran Seksyen B (Dungun - Mentakab) pula, sebanyak 125 lot telah dikenalpasti dan kawasan yang terlibat adalah Felda Sg. Panching Timur, Felda Sg. Panching Selatan, Felda Lepar Hilir 2, Felda Lepar Hilir 3 dan Felda Lepar Hilir 8. Manakala bagi jajaran Seksyen C (Mentakab - Pelabuhan Klang), sebanyak 166 lot tanah Felda terlibat di bawah Seksyen 4 Akta Pengambilan Tanah 1960 (pindaan 2016) merangkumi negeri Pahang dan negeri Sembilan di kawasan Felda Kemasul, Felda Chemomoi dan Felda Titi.

Perbincangan bersama pihak FELDA oleh MRL telah diadakan pada 27 Februari 2020 bagi memaklumkan lot tanah FELDA dan kawasan yang terlibat di bawah Akta Pengambilan Tanah 1960 (pindaan 2016).

Keseluruhan projek ECRL ini dijangka siap pada Disember 2026.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS (2020)**

PERTANYAAN : LISAN

**DARIPADA : YB. DATUK WIRA DR. MOHD HATTA
BIN MD. RAMLI [LUMUT]**

TARIKH : 27 JULAI 2020

SOALAN

YB. DATUK WIRA DR. MOHD HATTA BIN MD. RAMLI [LUMUT] minta **MENTERI PELANCONGAN, SENI DAN BUDAYA** menyatakan usaha MOTAC untuk merancakkan industri pelancongan khususnya Pulau Pangkor pasca COVID19.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) sentiasa mempromosikan Malaysia secara giat sebagai destinasi pelancongan yang utama. Antara langkah yang diambil untuk merangsangkan industri pelancongan negara adalah dengan mengadakan promosi bersama dengan syarikat penerbangan asing melalui program '*Joint International Development Tourism Programme*' (JITDP) iaitu program pembangunan pakej pelancongan antarabangsa di antara Tourism Malaysia dan Malaysia Airports Holdings Berhad (MAHB).
2. Kerjasama dengan semua syarikat penerbangan tempatan seperti Malaysia Airlines, Air Asia, Malindo Air, MasWings dan Fire Fly turut dijalinan bagi mempromosikan destinasi pelancongan dalam negara. Pejabat Tourism Malaysia di luar negara turut memainkan peranan dalam mempromosikan Malaysia melalui penyertaan pameran pelancongan, aktiviti-aktiviti promosi melalui laman media sosial serta sesi libat urus dengan pihak-pihak yang berkenaan.
3. Bagi merancakkan industri pelancongan di Negeri Perak, khususnya di Pulau Pangkor, MOTAC sentiasa bekerjasama dengan Kerajaan Negeri Perak, badan-badan Bukan Kerajaan (NGO) serta sektor dalam melaksanakan promosi produk pelancongan di pulau tersebut. Antara aktiviti yang telah dan akan dilaksanakan ialah:
 - (i) penyertaan di *PATA Dream to Travel Festival 2020* oleh agensi pelancongan, hotel dan produk dari Perak dengan mengetengahkan pakej-pakej pelancongan untuk Pulau Pangkor, Ipoh, Royal Belum dan Kuala Kangsar. Program yang berlangsung secara maya ini bermula dari 22 Jun hingga 17 Julai 2020;

NO. SOALAN : 21

- (ii) promosi Kempen Pelancongan Domestik- Cuti-Cuti Malaysia melalui media elektronik milik Kerajaan dan swasta seperti promosi di rancangan TV dan rangkaian radio pelbagai Bahasa milik RTM;
- (iii) penganjuran program Penyerahan Sijil Pematuhan Garis Panduan Amalan Terbaik Produk Pelancongan di Negeri Perak Pasca COVID-19 yang turut melibatkan pemilik produk pelancongan daripada Pulau Pangkor pada 1 Julai 2020 di Hotel Casuarina Meru, Ipoh;
- (iv) bekerjasama dengan Kerajaan Negeri Perak berkaitan inisiatif mewujudkan 1,500 keping *Travel Vouchers #TravelPerakLah* Pasca Covid 19 yang telah menghimpunkan baucer promosi daripada hotel-hotel penginapan dan produk-produk pelancongan menarik sekitar Perak termasuk di Pulau Pangkor. Pelancaran bagi inisiatif ini telah diadakan di Kellies' Castle, Perak pada 18 Jun 2020;
- (v) menganjurkan program *Business To Business* (B2B) pada 3 Julai 2020 di The Haven Hotel, Ipoh, Perak. Keseluruhan peserta adalah seramai 120 orang yang terdiri dari wakil-wakil agensi pelancongan dari pelbagai negeri seperti Kuala Lumpur, Penang, Selangor dan juga pemilik produk-produk pelancongan di Perak termasuk dari Pulau Pangkor;
- (vi) bagi penganjuran POP (*Pride of Perak*) *Travels* - Cer Citer, iaitu pertandingan bercerita secara digital melibatkan penceritaan terhadap kawasan, tokoh tempatan, sejarah, warisan, seni dan budaya negeri Perak. Pertandingan ini telah diadakan bermula 30 Jun 2020 sehingga penghujung bulan Ogos 2020 dan terbuka kepada semua pemandu pelancong warganegara Malaysia yang berlesen di bawah Kementerian Pelancongan, Seni dan Budaya Malaysia dan menjalankan perkhidmatan di negeri Perak;
- (vii) penganjuran Webinar Perak Online Tourism Symposium 2020 yang telah diadakan pada 11 April 2020 secara maya.

NO. SOALAN : 21

- (viii) penerbitan Booklet 'Pakej MYexperience' yang mengandungi 500 pakej-pakej 'niche' / pakej-pakej minat khas yang komprehensif termasuk pakej pelancongan pulau dan pantai dari Negeri Perak dan pakej Pulau Pangkor khususnya turut ada ditawarkan di dalam booklet tersebut;
- (ix) Mengadakan *Familiarization Trip* (Fam Trip) ke Pulau Pangkor bagi membuat liputan serta penggambaran;
- (x) Mempromosikan Pulau Pangkor sebagai pulau bebas cukai (PBC) yang telah mendapat pengisytiharan status PBC secara rasmi pada 1 Januari 2020; dan
- (xi) Memuatnaik rakaman video program-program kesenian-kesenian tradisional yang menjadi identiti negeri Perak seperti Rebana Perak, Dabus, Belotah, Kuih Limas dan kesenian masyarakat orang asal ke dalam laman media sosial MOTAC dan agensi-agensi di bawah seliaannya dalam mempromosikan produk-produk seni negeri Perak ini kepada masyarakat di luar negeri Perak.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : DATO' SERI ANWAR BIN IBRAHIM
[PORT DICKSON]
TARIKH : 27 JULAI 2020 (ISNIN)

SOALAN

Minta **MENTERI PENGAJIAN TINGGI** menyatakan bagaimana Kementerian menangani isu kemasukan pelajar-pelajar sekolah ke Institusi Pengajian Tinggi (IPT) setelah proses pembelajaran terjejas akibat COVID-19 dan apakah Kementerian bercadang menyemak semula kriteria kelayakan kemasukan ke IPT bagi pelajar yang terjejas pencapaian mereka kerana COVID-19.

JAWAPAN

Tuan Yang di-Pertua,

Pelajar yang mengambil peperiksaan Sijil Pelajaran Malaysia (SPM) pada tahun 2017, 2018 dan 2019 layak memohon untuk melanjutkan pengajian ke institusi pengajian tinggi bagi sesi 2020/2021. Pelajar-pelajar ini tidak terkesan dengan pandemik COVID-19.

Bagi kemasukan untuk sesi 2021/2022 pula akan melibatkan pelajar-pelajar yang mengambil peperiksaan SPM pada tahun 2020. Walau bagaimanapun, disebabkan oleh sesi persekolahan yang terjejas oleh COVID-19, peperiksaan ini telah ditangguhkan pelaksanaannya oleh Kementerian Pendidikan Malaysia sehingga suku tahun pertama 2021. Penangguhan pelaksanaan peperiksaan SPM ini bertujuan untuk memberikan masa yang mencukupi kepada pelajar bagi mendapatkan pembelajaran yang sepatutnya dan bersedia menghadapi peperiksaan. Kementerian Pendidikan Malaysia masih mengekalkan instrumen penilaian dan struktur peperiksaan SPM seperti sedia ada.

Sehubungan dengan itu, Kementerian Pengajian Tinggi (KPT) tidak bercadang untuk menyemak semula kriteria kelayakan masuk ke Institusi Pengajian Tinggi dan mengekalkan syarat memiliki SPM dengan melepasi Syarat Am dan Syarat Khas program bagi sesi kemasukan tahun 2021/2022. KPT telah membuat penyelarasan bersama dengan KPM dalam merancang pelaksanaan pemprosesan pemilihan pelajar ke Institusi Pengajian Tinggi supaya kemasukan dapat dilaksanakan selewat-lewatnya Oktober 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : PUAN VIVIAN WONG SHIR YEE [SANDAKAN]

TARIKH : 27 JULAI 2020 (ISNIN)

SOALAN

Minta **MENTERI PENGANGKUTAN** menyatakan sekiranya Kementerian akan bekerjasama dengan syarikat penerbangan tempatan sekali lagi untuk memperkenalkan penerbangan tambahan dengan harga tetap antara Kuala Lumpur - Sandakan pada musim perayaan Hari Raya Haji yang akan datang untuk membolehkan lebih ramai orang Sabah pulang untuk meraikannya bersama keluarga.

JAWAPAN

Yang Dipertua,

Untuk makluman Yang Berhormat, penularan wabak COVID-19 telah menjejaskan industri penerbangan negara. Jumlah perkhidmatan penerbangan penumpang berjadual telah mencatat penurunan sebanyak 94.3 peratus iaitu dari 8,709 kekerapan seminggu pada Mei 2019 kepada hanya 493 kekerapan seminggu untuk tempoh yang sama pada 2020. Jumlah destinasi penerbangan juga berkurangan dari 137 destinasi pada Mei 2019 kepada 57 destinasi untuk tempoh yang sama pada 2020. Jumlah purata trafik penumpang bulanan juga telah menunjukkan penurunan mendadak sebanyak 97.2% iaitu dari 8.3 juta penumpang pada Mei 2019 kepada hanya 232,793 penumpang pada Mei 2020.

Statistik menunjukkan trend penurunan permintaan penumpang domestik dan antarabangsa mulai 1 Mac 2020. Jumlah permintaan penumpang berkurangan daripada 280,321 sehari pada bulan Januari 2020 kepada 7,500 sehari bagi bulan Mei 2020. Berdasarkan unjuran senario trafik penumpang Malaysia 2020, Suruhanjaya Penerbangan Malaysia (MAVCOM) menjangkakan jumlah tempat duduk perkhidmatan penerbangan penumpang akan berkurangan kepada 54.3 juta hingga 56.0 juta bersamaan -48.7% hingga -50.3% pada tahun 2020 (2019 mencatatkan 109.2 juta penumpang).

Pada masa ini, nisbah penawaran tempat duduk seminggu adalah melebihi daripada permintaan (*supply over demand*) pada kadar 1.9 :1 (Jun 2020). Ini menunjukkan tahap keyakinan terhadap penerbangan masih rendah sehingga menyebabkan penawaran tempat duduk oleh syarikat penerbangan adalah lebih tinggi daripada permintaan. Syarikat penerbangan juga pada masa ini beroperasi pada kadar 20% dari kapasiti sebenar. Perkara ini telah menyebabkan harga tambang lebih tinggi bagi membolehkan syarikat penerbangan mendapatkan pulangan modal (*breakeven*).

Pada masa ini, terdapat penerbangan terus oleh Malaysia Airlines Berhad (MAB) dan AirAsia dari Lapangan Terbang Antarabangsa Kuala Lumpur (KLIA) dan klia2 ke Lapangan Terbang Sandakan dengan jumlah kekerapan keseluruhan sebanyak 11 kali seminggu. Manakala dari destinasi-destinasi lain seperti Kota Kinabalu, Kudat, Tawau dan Lahad Datu pula, jumlah kekerapan adalah sebanyak 51 kali seminggu yang disediakan oleh AirAsia dan MASwings.

Untuk makluman Yang Berhormat, penetapan tambang penerbangan domestik oleh syarikat-syarikat penerbangan negara adalah berdasarkan kepada rasionalisasi sektor perkhidmatan udara domestik pada tahun 2006. Dalam hal ini, Jemaah Menteri telah memutuskan bahawa syarikat-syarikat penerbangan negara yang menyediakan perkhidmatan udara domestik diberikan kebebasan dalam menentukan liputan rangkaian (network coverage), kekerapan penerbangan dan kadar tambang yang ingin ditawarkan berdasarkan permintaan pasaran.

Kerajaan sentiasa menggalakkan syarikat-syarikat penerbangan negara untuk meningkatkan kapasiti penerbangan semasa musim-musim perayaan khususnya di laluan-laluan yang mempunyai permintaan yang tinggi. Berdasarkan pemantauan yang dilaksanakan oleh Suruhajaya Penerbangan Malaysia (MAVCOM) bagi tempoh di antara 2 Jun hingga 17 Jun 2020, harga tambang penerbangan terutama dari Semenanjung ke Sabah dan Sarawak telah menunjukkan trend penurunan berbanding bulan Mei 2020.

Pada masa yang sama, Kementerian Pengangkutan telah mengarahkan MAVCOM untuk memantau kadar tambang yang dikenakan oleh syarikat penerbangan secara berterusan dan mengadakan sesi libat urus dengan syarikat-syarikat penerbangan bagi memastikan harga tambang yang dikenakan adalah kompetitif.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS TAHUN 2020**

PERTANYAAN : LISAN

**DARIPADA : DATO' HAJI MOHD FASIAH BIN HAJI
MOHD FAKEH [SABAK BERNAM]**

TARIKH : 27 JULAI 2020 (ISNIN)

SOALAN

DATO' HAJI MOHD FASIAH BIN HAJI MOHD FAKEH [SABAK BERNAM] minta **MENTERI PERTANIAN DAN INDUSTRI MAKANAN** menyatakan setakat manakah Kementerian telah mengenal pasti bidang kegiatan pertanian di seluruh negara dan nyatakan perancangan dan langkah Kementerian untuk memaju dan membangunkan sektor pertanian dan industri makanan bagi memenuhi keperluan negara dan turut meningkatkan lagi pendapatan golongan petani, nelayan dan pekebun kecil mengikut lokaliti dan aktiviti khususnya di kawasan pertanian seperti di Parlimen Sabak Bernam.

JAWAPAN

Tuan Yang Dipertua,

1. Kementerian Pertanian dan Industri Makanan (MAFI) telah mengenal pasti bidang kegiatan pertanian di seluruh negara yang meliputi bidang tanaman seperti sayur-sayuran dan buah-buahan, bidang perikanan seperti perikanan tangkapan dan akuakultur, bidang ternakan seperti daging dan telur ayam, ruminan (lembu/kambing) dan tenusu serta bidang industri asas tani seperti pemprosesan hasil pertanian dan makanan.

2. Antara perancangan dan langkah Kementerian untuk memaju dan membangunkan sektor pertanian dan industri makanan bagi memenuhi keperluan negara dan meningkatkan lagi pendapatan petani, nelayan dan pekebun kecil adalah melalui program seperti berikut:

- (i) Program Sumber Kekayaan Baharu seperti durian, nanas dan kelapa yang dapat menjana sumber pendapatan tambahan;
- (ii) Program Subsidi dan Insentif Padi dengan pemberian input seperti benih, baja dan racun bagi meningkatkan pengeluaran padi dan pendapatan pesawah;
- (iii) Program Pembangunan Kluster Buah-Buahan Tropika seperti betik, pisang, tembikai, rambutan dan manga harumanis bagi meningkatkan pengeluaran dan mensasarkan pasaran eksport;
- (iv) Program Pemodenan Vesel Penangkapan Ikan bagi menerokai aktiviti penangkapan ikan laut dalam dan meningkatkan hasil perikanan serta pendapatan nelayan; dan
- (v) Program Pembangunan Ruminan bagi menggalakkan pertumbuhan industri ruminan dan meningkatkan tahap sara diri (SSL) daging.

3. Program-program di atas akan terus diperkasakan dan dimantapkan bagi meningkatkan pengeluaran makanan negara dan menyumbang kepada pendapatan golongan sasar.

4. Selain itu, Kementerian melalui Jabatan Pertanian telah membangunkan peta kesesuaian tanaman mengikut siri tanah di sesuatu lokaliti yang dikenali sebagai Peta Zon Agro-Ekologi. Bagi Parlimen Sabak Bernam, tanaman yang sesuai dibangunkan adalah padi, kelapa, pisang dan ubi. Mengikut rekod, seramai 28,954 orang petani di Parlimen Sabak Bernam telah mendapat pelbagai insentif dan bantuan dalam bentuk input, peralatan dan khidmat nasihat daripada Jabatan Pertanian meliputi tanaman padi, kelapa, pisang, kelulut dan tanaman herba. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJAH AZIZAH BINTI DATUK SERI
PANGLIMA HAJI MOHD DUN [BEAUFORT]**

TARIKH : 27 JULAI 2020 (ISNIN)

SOALAN

Minta **MENTERI PENDIDIKAN** menyatakan adakah kementerian akan meneruskan Program Sarapan Makanan ke sekolah pada sesi 2020 terutamanya pelajar yang kurang berkemampuan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) tidak akan meneruskan Program Sarapan Pagi. Perkara ini telah diputuskan dalam Mesyuarat Jemaah Menteri pada 15 Januari 2020 dengan mengambil kira implikasi kos pelaksanaan dan kelestarian program. Jemaah Menteri juga memutuskan supaya program rancangan makanan sedia ada untuk murid sekolah rendah, iaitu Program Rancangan Makanan Tambahan (RMT) diteruskan dengan beberapa penambahbaikan.

Sehubungan itu, KPM telah melaksanakan Penambahbaikan Program Rancangan Makanan Tambahan (PPRMT) mulai 20 Januari 2020. Program ini memberi manfaat kepada 4,873 orang murid di 100 buah sekolah terpilih seluruh negara. Anggaran perbelanjaan bagi pelaksanaan PPRMT adalah sebanyak RM2.4 juta setahun. Antara penambahbaikan yang dilaksanakan dalam PPRMT ialah:

1. kumpulan murid yang layak telah diperluaskan daripada keluarga dalam kategori miskin tegar ke kategori miskin berdasarkan Jadual Paras Garis Kemiskinan (PGK) Nasional; dan
2. waktu pelaksanaan PPRMT ditetapkan sebelum sesi pengajaran dan pembelajaran bermula. Bagi murid sesi pagi, waktu makan adalah pada jam 7.00 pagi hingga 7.30 pagi. Manakala, bagi murid sesi petang, waktu makan adalah pada jam 12.30 tengah hari hingga 2.00 petang.

Dalam masa yang sama, KPM juga masih meneruskan Program RMT sedia ada di semua sekolah rendah KPM. Program ini memberi manfaat kepada 473,617 murid dengan peruntukan sebanyak RM295 juta bagi tahun 2020. Kriteria yang ditetapkan untuk penerima RMT sedia ada adalah seperti berikut:

1. murid warganegara Malaysia dari Tahun 1 hingga Tahun 6 di semua sekolah kerajaan dan sekolah bantuan kerajaan;
2. murid dalam keluarga yang pendapatan Isi Rumah (IR) adalah di bawah PGK (kategori miskin tegar);
3. murid sekolah Orang Asli / Penan (kecuali yang tinggal di asrama); dan
4. Murid Berkeperluan Khas (OKU).

Selain daripada menyediakan makanan berkhasiat, murid juga diberikan pendedahan mengenai pendidikan kesihatan dengan mengamalkan pengambilan sarapan serta gaya hidup sihat. Program ini juga dapat menerapkan nilai murni, pembinaan sahsiah diri dan disiplin melalui amalan adab dan etika makan dalam kalangan murid.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 27 JULAI 2020 (ISNIN)

SOALAN

Minta **MENTERI PENDIDIKAN** menyatakan bilakah Kementerian Pelajaran dan Inovasi Sabah akan diberi autonomi sepenuhnya mengendalikan hal ehwal pembangunan pelajaran di negeri Sabah.

JAWAPAN

Tuan Yang di-Pertua,

Perkara 74 Perlembagaan Persekutuan menyatakan bahawa Kerajaan Persekutuan mempunyai kuasa perundangan dalam hal perkara berkaitan pendidikan sebagaimana yang dinyatakan dalam Butiran 13 Senarai I (Senarai Persekutuan) Jadual Kesembilan Perlembagaan Persekutuan. Justeru, Kerajaan Persekutuan melalui Akta Pendidikan 1996 [*Akta 550*] mengawal selia hal perkara Pendidikan iaitu berkenaan dengan pendidikan rendah, menengah, vokasional dan teknik, latihan guru, pendaftaran dan pengawalan guru serta pengurus dan sekolah. Setakat ini seperti yang termaktub dalam Perlembagaan Persekutuan, hal perkara berkaitan pendidikan masih merupakan hal perkara Persekutuan.

Memandangkan Perkara 80 Perlembagaan Persekutuan menyatakan bahawa kuasa eksekutif Persekutuan meliputi segala perkara yang mengenainya Parlimen boleh membuat undang-undang dan kuasa eksekutif sesuatu Negeri meliputi segala perkara yang

mengenainya Badan Perundangan Negeri itu boleh membuat undang-undang, Badan Perundangan Negeri tidak boleh membuat sesuatu undang-undang yang mengatasi undang-undang Persekutuan dalam hal perkara yang merupakan kuasa perundangan Persekutuan. Maka, sesuatu Negeri tidak boleh menjalankan kuasa eksekutif tanpa kuasa perundangan yang diberikan dalam Perlembagaan Persekutuan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS 2020**

PERTANYAAN : LISAN

DARIPADA : YB. TUAN KHOO POAY TIONG [KOTA MELAKA]

TARIKH : 27 JULAI 2020

SOALAN

YB. TUAN KHOO POAY TIONG [KOTA MELAKA] minta **MENTERI PELANCONGAN, SENI DAN BUDAYA** menyatakan :

- (a) apakah langkah-langkah jangka masa pendek, sederhana, dan panjang Kementerian untuk memulihkan sektor pelancongan negara dalam situasi COVID-19, khasnya dalam isu kehilangan pekerjaan di sektor tersebut; dan
- (b) maklumat dan statistik mengenai Skim Pembiayaan Pelancongan Penjana.

JAWAPAN

Tuan Yang di-Pertua,

1. Berikutan terjejasnya industri pelancongan akibat pandemik COVID-19, fokus utama Kerajaan adalah untuk memastikan kelangsungan perniagaan dan aktiviti dalam industri ini. Sehubungan itu, Kerajaan telah mengumumkan beberapa pakej rangsangan ekonomi, antaranya adalah PRIHATIN, PRIHATIN PKS TAMBAHAN dan PENJANA. Antara insentif yang diperkenalkan oleh Kerajaan di bawah Pakej Rangsangan Ekonomi yang dapat membantu meringankan beban penggiat industri pelancongan termasuklah:

- (i) Skim Pembiayaan Pelancongan PENJANA sebanyak RM1 bilion bagi PKS sektor pelancongan;
- (ii) Pengecualian cukai pelancongan sepenuhnya bagi tempoh mulai 1 Julai 2020 hingga 30 Jun 2021;
- (iii) Pelanjutan pengecualian cukai perkhidmatan ke atas perkhidmatan penginapan mulai 1 September 2020 hingga 30 Jun 2021;
- (iv) Program Subsidi Upah yang membolehkan bayaran RM600 sebulan bagi setiap pekerja dilanjutkan selama 3 bulan lagi sehingga 30 September 2020;
- (v) Inisiatif bantuan Perusahaan Kecil dan Sederhana (PKS) seperti kempen Mikro dan PKS E-Dagang, Skim Pembiayaan PKS PENJANA, Program Pembiayaan Mikro PENJANA dan Geran Padanan Pendigitalan PKS;
- (vi) Potongan cukai untuk perbelanjaan berkaitan COVID-19 seperti pembelian PPE/ pengimbas suhu dan kos ujian saringan;

(vii) Penawaran penangguhan atau moratorium bayaran pinjaman selama 6 bulan; dan

(viii) Pemberian diskaun sehingga 50% ke atas bil elektrik.

2. Bermula 10 Jun 2020, sebahagian besar aktiviti ekonomi termasuk pelancongan domestik telah dibenarkan untuk kembali beroperasi dengan mematuhi prosedur operasi standard (SOP). Sehubungan itu, demi memastikan keselamatan warganegara dan pengusaha industri pelancongan bebas daripada jangkitan COVID-19, Kementerian Pelancongan, Seni dan Budaya (MOTAC) komited untuk meningkatkan kualiti produk dan perkhidmatan pelancongan terutamanya daripada aspek kesihatan dan kebersihan (*health safety and hygiene*) selaras dengan norma baharu.

3. Dalam hal ini, MOTAC telah menyediakan SOP bagi pembukaan semula sub-sektor pelancongan dan kebudayaan. Sehingga kini, sebanyak 14 aktiviti sub-sektor di bawah seliaan MOTAC telah dibenarkan beroperasi dengan SOP. Antaranya ialah Premis Penginapan Hotel, Syarikat Pengendali Pelancongan, Pemanduan Pemandu Pelancong; Program Pengalaman Homestay Malaysia, Taman Tema, penganjuran *Meetings, Incentives, Conferences, Exhibitions* (MICE), Spa, Pusat Wellness, Pusat Urut Kaki dan Pusat Refleksologi dan Pameran pengembaraan dan perdagangan.

4. Bagi membantu merancakkan pelancongan domestik, Kerajaan juga telah mengumumkan pelepasan cukai pendapatan individu sehingga RM1,000 bagi perbelanjaan melancong dalam negara sehingga 31 Disember 2021 menerusi inisiatif Pakej Rangsangan Ekonomi. Berikutan kelonggaran yang diberikan kepada pelancong kesihatan dalam tempoh PKPP, MOTAC akan terus bekerjasama dengan Majlis Pelancongan Kesihatan atau MHTC bagi terus mempromosikan pelancong kesihatan ke Malaysia.

5. Selain itu, MOTAC turut menyasarkan untuk memberi keutamaan kepada ketibaan pelancong asing dari pasaran jarak dekat melalui pelancongan rentas sempadan atau *cross border tourism* menerusi pelaksanaan gelembung perjalanan atau *travel bubble* dengan negara-negara jiran atau negara-negara zon hijau yang telah dikenalpasti oleh KKM dan MKN. Pelaksanaan gelembung perjalanan ini adalah tertakluk kepada perbincangan dua hala dengan mengambil kira aspek kesihatan, imigrasi, pengesanan data, dan pemantauan berterusan oleh agensi-agensi berkenaan dengan negara-negara yang bakal terlibat.

6. Di samping itu, MOTAC terus komited melaksanakan pelancongan lestari seiring dengan *Agenda Sustainable Development Goals 2030* oleh Pertubuhan Bangsa-Bangsa Bersatu yang bertujuan untuk melindungi, memulih dan memulihara alam sekitar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA PENGGAL KETIGA PARLIMEN KEEMPAT
BELAS TAHUN 2020**

PERTANYAAN : LISAN
DARIPADA : DR. MASZLEE BIN MALIK
[SIMPANG RENGAM]
TARIKH : 27 JULAI 2020 (ISNIN)

SOALAN

Minta **MENTERI PENGAJIAN TINGGI** menyatakan apakah status terkini usaha pihak Kementerian dalam memansuhkan Akta Universiti dan Kolej Universiti dan menggantikannya dengan satu akta yang lebih baik dan komprehensif.

JAWAPAN

Tuan Yang di-Pertua,

Akta Universiti dan Kolej Universiti 1971 (Akta 30) [AUKU] telah diwartakan pada 30 April 1971 dan merupakan akta induk bagi maksud menubuh, menyelenggara dan mentadbir universiti dan kolej universiti awam di Malaysia. Selain daripada perkara berkaitan pelajar, kandungan utama AUKU turut merangkumi hal berkaitan staf universiti dan tadbir urus universiti seperti punca kuasa penubuhan, kuasa universiti dan perlembagaan universiti.

Sejak diwartakan pada tahun 1971, AUKU telah pun dipinda sebanyak tujuh (7) kali agar fungsi dan kuasanya selari dengan kehendak semasa. Contoh terdekat ialah pindaan pada tahun 2012 dan 2019 yang telah memberikan kebebasan untuk pelajar menyertai aktiviti parti politik di dalam dan di luar kampus. Ia dilaksanakan bertepatan dengan peredaran zaman dan sebagai usaha menghasilkan graduan holistik yang berdaya saing serta matang dalam membuat keputusan.

Untuk makluman Ahli Yang Berhormat, Kementerian berpandangan bahawa Akta sedia ada masih lagi relevan dalam menguatkuasakan fungsinya. Oleh yang demikian, Kementerian belum bercadang untuk memansuhkannya dalam masa terdekat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SIVAKUMAR VARATHARAJU
NAIDU [BATU GAJAH]**

TARIKH : 27 JULAI 2020 (ISNIN)

SOALAN

Minta **MENTERI PENDIDIKAN** menyatakan status sekolah-sekolah Tamil yang masih dalam pembinaan. Bilakah sekolah-sekolah ini dijangka siap keseluruhannya.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam menyediakan persekitaran yang selamat dan kondusif bagi tujuan pengajaran dan pembelajaran murid di semua sekolah seluruh negara.

Sehingga 30 Jun 2020, empat projek sekolah kerajaan bagi kategori Sekolah Jenis Kebangsaan Tamil (SJKT), yang dibiayai melalui peruntukan pembangunan, berada dalam fasa pembinaan. Projek ini merangkumi pelbagai skop pembinaan seperti bilik darjah, blok pentadbiran, bilik komputer, bilik sains, kemudahan mesra Orang Kurang Upaya (OKU), makmal dan kemudahan lain. Projek-projek berkenaan dijangka akan siap sepenuhnya pada bulan Mac 2021.

Senarai projek tersebut adalah seperti berikut:

- 1) Pembinaan Baharu SJKT Bandar Sri Alam, Pasir Gudang, Johor.
- 2) Pembinaan Baharu SJKT Taman PJS 1, Petaling, Selangor.
- 3) Pembinaan Gantian Penuh di tapak baharu SJKT Jalan Tajul, Johor.
- 4) Pembinaan Gantian Penuh di tapak baharu SJKT Gunung Rapat, Ipoh, Perak.

Bagi tujuan pembinaan sekolah gantian dan pembinaan blok tambahan untuk Sekolah Bantuan Kerajaan sedia ada, Kerajaan menyediakan peruntukan secara *one-off* melalui Pakej Rangsangan Khas, 2012-2014. Di bawah Pakej Rangsangan Khas ini, terdapat 19 projek pembinaan gantian penuh dan 18 projek pembinaan blok tambahan bagi SJKT.

Sehingga 30 Jun 2020, 11 projek pembinaan gantian penuh SJKT telah siap sepenuhnya dan lapan projek masih di dalam pembinaan. Senarai projek dalam pembinaan dan jangkaan tarikh siap adalah seperti berikut:

Bil.	Nama Sekolah	Jangkaan Tarikh Siap
1.	SJKT Regent, Gemencheh, Negeri Sembilan.	Oktober 2020
2.	SJKT Ladang Sungai Reyla, Perak.	Disember 2020
3.	SJKT Ladang Blue Valley, Pahang.	Disember 2020
4.	SJKT Ladang Seafield, Petaling Perdana, Selangor	Disember 2020
5.	SJKT Ladang Brauston, Selangor	Oktober 2020
6.	SJKT Ladang Pertang, Negeri Sembilan	Disember 2020
7.	SJKT Ladang Jeram, Pahang	Jun 2021
8.	SJKT Ladang Minyak, Serendah Hulu, Selangor	Ogos 2021

Di samping itu, sebanyak 10 projek pembinaan blok tambahan bagi SJKT di bawah Pakej Rangsangan Khas telah siap sepenuhnya dan lapar lagi projek masih dalam fasa pembinaan. Jangkaan tarikh siap lapar sekolah tersebut adalah seperti berikut:

Bil.	Nama Sekolah	Jangkaan Tarikh Siap
1.	SJKT Kuala Terla, Pahang	Disember 2020
2.	SJKT Ladang Sg. Kawang, Pahang	Oktober 2020
3.	SJKT Ladang Effingham, Petaling Utama, Selangor	Disember 2020
4.	SJKT Ladang Kalumpang, Selangor	Disember 2020
5.	SJKT Ladang Thamboosamy, Kuala Lumpur	Oktober 2020
6.	SJKT Ladang St. Helier, Negeri Sembilan	Disember 2020
7.	SJKT Ladang Sagga, Negeri Sembilan	Disember 2020
8.	SJKT Ladang Bukit Jalil, Selangor	September 2020

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KEDUA , PENGKAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN CHE ALIAS BIN HAMID
[KEMAMAN]**

TARIKH : 27 JULAI 2020 (ISNIN)

SOALAN NO.37

Minta **MENTERI TENAGA DAN SUMBER ASLI** menyatakan keseriusan pihak Kementerian dalam memerangi aktiviti yang melibatkan pembalakan haram sepanjang pandemik COVID-19 menular.

JAWAPAN

Tuan Yang di-Pertua,

1. Kementerian melalui Jabatan Perhutanan Semenanjung Malaysia (JPSM) sentiasa bersiap siaga dalam memerangi kes kesalahan hutan di dalam kawasan Hutan Simpanan Kekal terutamanya yang melibatkan pembalakan haram. Sepanjang tempoh penularan pandemik COVID-19 ini, aktiviti penguatkuasaan hutan sentiasa dijalankan seperti biasa sebagaimana yang dilaksanakan sebelum tempoh Perintah Kawalan Pergerakan (PKP), terutamanya di kawasan *hotspot* dan berisiko tinggi

berlakunya kes kesalahan hutan dengan mengamalkan norma baharu sepertimana yang telah ditetapkan oleh Majlis Keselamatan Negara (MKN).

2. Sepanjang tempoh PKP dan Perintah Kawalan Pergerakan Bersyarat (PKPB), JPSP telahpun mengarahkan semua Jabatan Perhutanan Negeri untuk melaksanakan tugas-tugas penguatkuasaan hutan di negeri masing-masing selaras dengan Akta Perhutanan Negara [Akta 313] dan garis panduan (SOP) yang berkuatkuasa. Dimaklumkan bahawa sepanjang tempoh tersebut, sebanyak 71 kes kesalahan hutan telah direkodkan dan telah dibuka kertas siasatan. Daripada jumlah tersebut, ia melibatkan seramai 47 orang yang disyaki (ODS) yang terdiri daripada 41 warga tempatan dan 6 warga asing bagi pelbagai kes kesalahan hutan.

3. Sehingga kini, kes pembalakan haram yang direkodkan daripada bulan Januari hingga Mei 2020 di Semenanjung Malaysia adalah sebanyak 8 kes di mana 6 kes adalah dalam tempoh PKP dan PKPB.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DATUK MOHAMAD BIN ALAMIN [KIMANIS]

TARIKH : 27 JULAI 2020 (ISNIN)

SOALAN NO. 39

Minta **MENTERI TENAGA DAN SUMBER ASLI** menyatakan apakah usaha-usaha Kementerian yang telah diambil untuk meningkatkan kualiti perkhidmatan elektrik di Sabah.

JAWAPAN

Tuan Yang di-Pertua,

Kementerian telah melaksanakan pelbagai usaha untuk membantu meningkatkan kualiti bekalan dan perkhidmatan elektrik di Sabah seperti berikut:

1. Kerajaan telah melaksanakan perancangan pembekalan elektrik Sabah melalui Pelan Pembangunan Penjanaan yang diluluskan oleh Jawatankuasa Perancangan dan Pelaksanaan Pembekalan Elektrik dan Tarif (JPPPET) Sabah yang dianggotai oleh agensi-

agensi Kerajaan Persekutuan dan Kerajaan Negeri Sabah yang berkaitan serta syarikat utiliti Sabah Electricity Sdn Bhd.

Pelan Pembangunan Penjanaan ini menetapkan perancangan penjanaan bagi tempoh jangka panjang (sehingga 20 tahun) dan jangka pendek (sehingga 10 tahun sahaja) untuk negeri Sabah berdasarkan analisis lengkap oleh Suruhanjaya Tenaga selaku badan regulatori industri bekalan elektrik negara. Ia dirangka dengan mengambil kira penilaian unjuran permintaan, opsyen teknologi penjanaan, kecukupan bahan api dan kos pembekalan yang paling optimum;

2. Kerajaan Persekutuan juga telah menyediakan geran berjumlah RM2.3 bilion dan pinjaman berjumlah RM1.14 bilion di bawah Rancangan Malaysia ke-11 (RMK-11) bagi pelaksanaan projek-projek pengukuhan sistem penghantaran dan pembahagian bekalan elektrik. Projek-projek ini dilaksanakan oleh Pasukan Projek Khas Bekalan Elektrik Sabah (PPKBES) dan Sabah Electricity Sendirian Berhad (SESB); dan
3. Kerajaan Persekutuan juga menyediakan peruntukan subsidi yang besar kepada SESB yang merangkumi subsidi bahan api, subsidi solar dan subsidi sokongan tarif yang berjumlah RM3.7 bilion bagi tempoh 2012 sehingga 2019, bagi memastikan kemampunan operasi syarikat utiliti tersebut.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS TAHUN 2020**

PERTANYAAN : LISAN

**DARIPADA : DATUK SERI HAJI SALAHUDDIN BIN AYUB
[PULAI]**

TARIKH : 27 JULAI 2020 (ISNIN)

SOALAN

DATUK SERI HAJI SALAHUDDIN BIN AYUB [PULAI] minta **MENTERI PERTANIAN DAN INDUSTRI MAKANAN** menyatakan impak COVID-19 terhadap industri pertanian:

- (a) nilai impak (dalam RM) bagi setiap sektor; dan
- (b) berapakah bilangan pengusaha tani skala kecil/ sederhana yang terkesan daripada pandemik ini dan apakah pelan Kementerian bagi membantu mereka menghadapi kemelut ekonomi ini.

JAWAPAN

Tuan Yang Dipertua,

1. Kementerian Pertanian dan Industri Makanan (MAFI) melalui Institut Penyelidikan dan Kemajuan Pertanian Malaysia (MARDI) sedang dalam proses pelaksanaan kajian impak COVID-19 kepada pengusaha tani termasuk petani, penternak dan nelayan setakat ini.
2. Mengikut rekod Kementerian, bilangan pengusaha tani skala kecil/ sederhana yang berdaftar merangkumi sektor tanaman, perikanan dan ternakan adalah seperti berikut:

- i. Tanaman – 332,906 orang;
- ii. Ternakan – 50,640 orang; dan
- iii. Perikanan – 151,148 orang.

Jumlah pengusaha tani tersebut adalah sebanyak 534,694 orang.

3. Berkenaan dengan pelan Kementerian bagi membantu pengusaha tani yang terkesan akibat pandemik COVID-19, MAFI melalui PRE, PRIHATIN dan PENJANA akan melaksanakan 36 inisiatif bagi merancakkan semula aktiviti pertanian dan pengeluaran makanan.

4. Di bawah PRIHATIN, MAFI diperuntukkan sebanyak RM190 juta bagi pelaksanaan Program Jaminan Bekalan Makanan melalui insentif / subsidi, peningkatan mobilisasi dan logistik bahan makanan serta pemantapan pembekalan stok makanan. Selain itu, Pertubuhan Peladang Kawasan (PPK) dan Pertubuhan Nelayan Kawasan (PNK) juga telah diperuntukkan dana khas untuk menggalakkan penglibatan dan aktiviti ahli peladang dan nelayan dalam industri pertanian dan makanan.

5. Di bawah PENJANA, MAFI telah diperuntukkan sebanyak RM400 juta untuk melaksanakan tiga (3) inisiatif khusus seperti berikut:

- i. Skim Pembiayaan Mikro Kredit yang menawarkan pinjaman dengan kadar faedah 3.5% untuk tempoh 5 tahun;
- ii. Program Kebuniti atau Berkebun secara berkomuniti di bandar dan luar bandar, berbentuk pemberian *in-kind* sebanyak RM500 untuk individu dan RM50,000 untuk komuniti; dan
- iii. Program Mobiliti Tenaga Kerja Agromakanan yang menyediakan latihan semula dalam industri agromakanan.

6. Keseluruhan program / projek yang disenaraikan di bawah pakej-pakej PRE (termasuk projek infrastruktur dengan peruntukan RM50 juta), PRIHATIN dan PENJANA bernilai RM640 juta sedang dilaksanakan melalui pelbagai jabatan / agensi di bawah MAFI.

7. Kementerian berharap agar inisiatif termasuk program dan projek serta bantuan khas ini dapat membantu meringankan bebanan kumpulan sasar yang terkesan akibat COVID-19 malahan dapat membantu keseluruhan sektor ekonomi termasuk pengusaha tani untuk kembali pulih dan meneruskan kelangsungan perusahaan masing-masing bagi merancakkan semula aktiviti pertanian dan melonjakkan sektor agromakanan negara serta memastikan sekuriti makanan terus terjamin sepanjang tempoh pemulihan ekonomi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN MUHAMMAD BAKHTIAR WAN CHIK
[BALIK PULAU]**

TARIKH : 27 JULAI 2020 (ISNIN)

SOALAN

Minta **MENTERI PENGANGKUTAN** menyatakan pendirian Kerajaan terhadap larangan penjualan minuman alkohol akibat kes mabuk langgar berleluasa. Apakah dapatan hasil soal selidik mengenai “Pengambilan Alkohol dan Penguatkuasaan Undang-undang Yang Lebih Tegas Terhadap Kesalahan Memandu Dalam Keadaan Mabuk”.

JAWAPAN

Yang di-Pertua,

Untuk makluman Yang Berhormat, isu berkaitan dengan kemalangan maut yang disebabkan oleh pemandu yang memandu di bawah pengaruh alkohol adalah satu perkara yang amat dipandang serius oleh Kerajaan khususnya Kementerian Pengangkutan. Seperti umum mengetahui, kebelakangan ini, kemalangan maut melibatkan pemandu mabuk semakin kerap berlaku dan dilaporkan di dalam media massa. Sekiranya perkara ini tidak ditangani dengan serius, ia akan membawa kesan yang amat negatif kepada orang ramai dan pengguna jalan raya lain yang tidak bersalah.

Jemaah Menteri pada 17 Julai 2020 yang lalu antara lain telah bersetuju dengan Rang Undang-Undang Pengangkutan Jalan (Pindaan) 2020 melibatkan pindaan kepada 13 seksyen utama di bawah Akta Pengangkutan Jalan 1987 [Akta 333] termasuk pindaan seksyen 41-45 yang berkaitan dengan meningkatkan hukuman kesalahan berkaitan pemanduan cuai, di bawah pengaruh alkohol atau dadah. Pindaan Rang Undang-undang ini akan dibentangkan dalam sesi parlimen kali ini.

Selain daripada pindaan hukuman seperti pengenaan hukuman penjara sebagai satu bentuk hukuman yang mandatori bagi kesalahan yang berkenaan, Kerajaan juga akan meminda had kandungan alkohol yang dibenarkan supaya selaras dengan piawaian yang disyorkan oleh Pertubuhan Kesihatan Sedunia (WHO) iaitu daripada 35 mikrogram alkohol dalam 100 mililiter nafas; 80 miligram alkohol dalam 100 mililiter darah atau 107 miligram alkohol dalam 100 mililiter air kencing kepada 22 mikrogram alkohol dalam 100 mililiter nafas; 50 miligram alkohol dalam 100 mililiter darah atau 67 miligram alkohol dalam 100 mililiter air kencing.

Untuk makluman ahli-ahli yang terhormat juga, Kementerian Pengangkutan telah melaksanakan soal selidik atas talian mengenai perkara ini iaitu mulai 21 Mei 2020 sehingga 4 Jun 2020. Berdasarkan kepada dapatan kajian, sebanyak 345,021 responden telah menyertai soal selidik berkenaan.

Hampir 97% responden memberikan maklum balas yang positif dan bersetuju bahawa kuantum hukuman sedia ada tidak memadai. Sebagai contoh, seramai 324,489 iaitu 94% responden bersetuju agar kadar hukuman penjara, denda dan tempoh hilang kelayakan lesen memandu ditingkatkan ke atas pemandu yang disabitkan kesalahan memandu ketika berada di bawah pengaruh alkohol, bagi memberi kesedaran kepada umum dan keinsafan kepada pesalah.

Maka, Kementerian Pengangkutan berharap agar pindaan yang dicadangkan kali ini dapat mendidik dan mengubah sikap semua pengguna di atas jalan raya. Perkara ini sekali gus bertujuan membendung berlakunya kesalahan memandu di bawah pengaruh alkohol, dadah dan juga memandu secara melulu dalam menjaga keselamatan pengguna jalan raya di Malaysia secara keseluruhannya.

Berkenaan dengan penjualan minuman beralkohol, perkara ini merupakan bidang kuasa agensi lain contohnya seperti KPDNHEP, dan juga pihak PBT. Namun, seperti yang disarankan sebelum ini, pihak kementerian menekankan bahawa jangan memandu sekiranya telah minum minuman beralkohol.

Sekian, terima kasih

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS 2020**

PERTANYAAN : LISAN

DARIPADA : YB. PUAN NOORITA BINTI SUAL [TENOM]

TARIKH : 27 JULAI 2020

SOALAN

YB. PUAN NOORITA BINTI SUAL [TENOM] minta **MENTERI PELANCONGAN, SENI DAN BUDAYA** menyatakan sejauh mana kesan akibat COVID-19 kepada sektor pelancongan dan apakah langkah-langkah yang telah diambil oleh Kementerian untuk membantu pengusaha-pengusaha dalam sektor pelancongan, terutamanya sektor pelancongan di daerah pedalaman Sabah.

JAWAPAN

Tuan Yang di-Pertua,

1. Penularan wabak COVID-19 yang bermula sejak bulan Januari 2020 telah menyebabkan Kerajaan mengambil langkah untuk melaksanakan Perintah Kawalan Pergerakan atau PKP yang berkuatkuasa pada 18 Mac 2020. Susulan itu, Kementerian Pelancongan, Seni dan Budaya (MOTAC) telah mengumumkan pembatalan kempen Tahun Melawat Malaysia 2020 dengan serta-merta. Ini telah memberi kesan ke atas industri pelancongan negara dan menjejaskan banyak perniagaan dalam sektor-sektor berkaitan seperti penginapan, pengangkutan, membeli-belah, makanan dan minuman, dan penganjuran acara-acara perniagaan atau *MICE-Meetings, Incentives, Conventions and Exhibitions*. Sehingga Jun 2020, MOTAC menganggarkan kerugian sebanyak RM45 bilion bagi sektor-sektor ini.

2. Bagi memastikan kelangsungan perniagaan dan aktiviti penggiat industri pelancongan tempatan termasuk di Negeri Sabah, Kerajaan telah mengumumkan beberapa pakej rangsangan ekonomi, antaranya adalah PRIHATIN, PRIHATIN PKS TAMBAHAN dan PENJANA. Antara insentif yang diperkenalkan oleh Kerajaan di bawah Pakej Rangsangan Ekonomi bagi membantu meringankan beban penggiat industri pelancongan adalah:

- (i) Skim Pembiayaan Pelancongan PENJANA bagi PKS sektor pelancongan;
- (ii) Pengecualian cukai pelancongan sepenuhnya bagi tempoh mulai 1 Julai 2020 hingga 30 Jun 2021;
- (iii) Pelanjutan pengecualian cukai perkhidmatan ke atas perkhidmatan penginapan mulai 1 September 2020 hingga 30 Jun 2021;

NO. SOALAN : 42

- (iv) Program Subsidi Upah di mana bayaran RM600 sebulan bagi setiap pekerja dilanjutkan selama 3 bulan lagi sehingga 30 September 2020;
 - (v) Inisiatif bantuan Perusahaan Kecil dan Sederhana (PKS) seperti kempen Mikro dan PKS E-Dagang, Skim Pembiayaan PKS PENJANA, Program Pembiayaan Mikro PENJANA dan Geran Padanan Pendigitalan PKS;
 - (vi) Potongan cukai untuk perbelanjaan berkaitan COVID-19 seperti pembelian PPE/ pengimbas suhu dan kos ujian saringan;
 - (vii) Penawaran penangguhan atau moratorium bayaran pinjaman selama 6 bulan; dan
 - (viii) Pemberian diskaun sehingga 50% ke atas bil elektrik.
3. Tambahan kepada insentif tersebut, antara inisiatif khusus yang ditawarkan oleh MOTAC adalah:
- (i) pelaksanaan kursus *Domestic Tourism Vibes* secara dalam talian dengan kerjasama Persatuan Institut-institut Latihan Pelancongan Malaysia atau ATTIM dan *Malaysian Tourist Guide Council* atau MTGC bermula bulan Mei sehingga November 2020 kepada kumpulan pemandu pelancong berlesen yang akan tamat tempoh lesen pemanduan bermula bulan April sehingga Disember 2020;
 - (ii) pengecualian bayaran fi lesen bagi pengusaha-pengusaha pelancongan dan pemandu pelancong yang dilesenkan di bawah Akta Industri Pelancongan 1992 atau Akta 482 bermula 17 Mac hingga 31 Disember 2020;

NO. SOALAN : 42

- (iii) pemberian diskaun pembayaran kompaun sebanyak 40% kepada semua pengusahaan pelancongan dan pemandu pelancong berlesen yang dikenakan kompaun oleh Kementerian sebelum 31 Disember 2020;
 - (iv) pelanjutan tempoh bayaran kompaun sehingga 31 Disember 2020 bagi semua kompaun yang dikeluarkan kepada syarikat atau pemandu pelancong berlesen;
 - (v) pengecualian kompaun kepada pengusahaan pelancong dan pemandu pelancong yang gagal memperbaharui lesen dalam tempoh yang ditetapkan disebabkan oleh PKP dengan syarat permohonan lengkap perlu dikemukakan dalam tempoh 60 hari selepas tamat tempoh PKP; dan
 - (vi) bantuan dalam bentuk geran sepadan yang dikenali sebagai Galakan Melancong Malaysia (GAMELAN) bagi menjalankan aktiviti-aktiviti promosi dan pemasaran domestik untuk membantu penggiat industri pelancongan tempatan.
4. Selain itu, MOTAC turut bekerjasama dengan Kerajaan Negeri Sabah, Lembaga Pelancongan Sabah serta penggiat industri pelancongan di Sabah dalam usaha memulihkan industri pelancongan di Sabah menerusi publisiti dan promosi seperti:
- (i) menganjurkan webinar dengan menjemput para penggiat industri pelancongan bagi menjadi ahli panel. Antaranya ialah Program Sembang Santai Bersama Penggiat Industri Pelancongan dan Rakan Media “Siri 3: Kota Belud, Destinasi Pelancongan Millenial” yang disiarkan secara langsung pada 7 Julai 2020 pada laman Facebook rasmi Tourism Malaysia. Program ini diadakan secara bersiri dan memaparkan destinasi pelancongan berpotensi yang terpilih di negeri-negeri yang berlainan;

NO. SOALAN : 42

- (ii) promosi melalui laman media sosial dan digital melalui laman web Tourism Malaysia dan Youtube serta media sosial seperti Facebook, Twitter dan Instagram;
- (iii) promosi melalui media elektronik milik kerajaan dan swasta. Sebagai contoh, promosi di rangkaian radio dan rancangan TV milik RTM seperti program Selamat Pagi Malaysia dan Sabah FM. Pemilik agensi dan pengusaha produk pelancongan di Sabah diberi peluang untuk mempromosikan pakej-pakej pelancongan serta destinasi-destinasi menarik yang tersedia bagi pelancongan domestik bermula 10 Jun 2020; dan
- (iv) menyebarkan maklumat mengenai produk pelancongan yang terdapat di negeri-negeri kepada pelancong melalui Pejabat Wilayah Tourism Malaysia dan 19 buah *Tourism Information Centre* (TIC) di seluruh negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN TERESA KOK SUH SIM [SEPUTEH]

TARIKH : 27 JULAI 2020 (ISNIN)

SOALAN

PUAN TERESA KOK SUH SIM [SEPUTEH] minta **MENTERI KOMUNIKASI DAN MULTIMEDIA** menyatakan kos perbelanjaan pelan komunikasi di media tempatan terhadap wabak COVID-19 dalam tempoh Mac sehingga Jun 2020. Senaraikan pecahan perbelanjaan komunikasi di setiap media.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian Komunikasi dan Multimedia Malaysia (KKMM) melalui Jabatan Penerangan Malaysia (JaPen) telah membelanjakan sebanyak RM121,960.00 untuk perbelanjaan tindakan komunikasi bagi memastikan maklumat mengenai penularan wabak COVID-19 disampaikan dengan lebih efektif kepada masyarakat melalui 100 ruang paparan *billboard* milik Jabatan Penerangan Malaysia (JaPen) di lokasi strategik.
2. KKMM melalui JaPen turut mendapat kerjasama rakan strategik melalui paparan elektronik (skrin digital) sebanyak 2,051 skrin di lokasi yang terpilih.
3. Kos perbelanjaan Bernama pula berhubung pelan komunikasi bagi tempoh Mac sehingga Jun 2020 adalah seperti berikut:

- Program Radio merangkumi Kapsul/PSA dan Wawancara berjumlah RM775,000
- Program TV merangkumi Kapsul/PSA, Liputan Berita dan Sidang Media berjumlah RM13,961,200.

4. KKMM menerusi Jabatan Penyiaran Malaysia (RTM) pula telah menghasilkan dan menyiarkan bahan hebahan tentang pandemik Covid-19 dalam bentuk kapsul, Pesanan Khidmat Masyarakat (PSA), bahan berita, *posting* di media sosial, wawancara serta siaran langsung sidang media YAB Perdana Menteri dan Menteri-menteri Kanan pada setiap hari.

5. Sebanyak 5.3 juta pelaporan telah disiarkan daripada 20 Mac hingga 29 Jun 2020, bersamaan dengan 15,804 jam (Lima belas ribu lapan ratus empat jam) siaran di semua platform media RTM. Jika program-program yang disiarkan diterjemahkan dalam bentuk pulangan masa siaran, jumlah nilainya dianggarkan sebanyak RM787 juta.

6. Manakala dari segi ASTRO telah turut serta bersama pihak Kerajaan dan rakyat Malaysia dalam usaha memutuskan rangkaian pandemik COVID-19 dengan penyiaran maklumat penting daripada pihak kerajaan. Sepanjang tempoh Perintah Kawalan Pergerakan (PKP), ASTRO secara berterusan menyiarkan pengumuman khidmat awam (PKA) yang telah dibekalkan oleh pihak Kerajaan dan juga PKA yang telah diterbitkan sendiri oleh ASTRO. Dalam pada masa yang sama, ASTRO juga menyokong pihak kerajaan dalam menangani penularan penyebaran berita palsu.

7. Untuk makluman Yang Amat Berhormat, ASTRO telah menyiarkan lebih daripada 3000 jam PKA menerusi saluran televisyen dengan kekerapan yang tinggi bagi memastikan keberkesanan penyampaian mesej kepada para penonton. Saluran berita kami ASTRO Awani bersiaran selama 24 jam bagi memastikan para penonton mendapat maklumat terkini mengenai COVID-19 dan dalam pada masa yang sama dapat mengekang penularan berita palsu yang semakin berleluasa semasa tempoh PKP.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS (2020)**

PERTANYAAN : LISAN

**DARIPADA : YB. TUAN NOOR AMIN BIN AHMAD
[KANGAR]**

TARIKH : 27 JULAI 2020

SOALAN

YB. TUAN NOOR AMIN BIN AHMAD [KANGAR] minta **MENTERI PELANCONGAN, SENI DAN BUDAYA** menyatakan senaraikan jumlah hotel mengikut bintang yang ditutup dan tidak lagi dapat beroperasi kerana COVID-19.

JAWAPAN

Tuan Yang di-Pertua,

1. Untuk makluman semua Ahli Yang Berhormat, bidang tugas Kementerian Pelancongan, Seni dan Budaya di bawah peruntukan Akta Industri Pelancongan 1992 [*Akta 482*] dan Peraturan-Peraturan ialah menguruskan pendaftaran dan pengelasan premis penginapan pelancong. Skim pengelasan hotel telah dilaksanakan sejak 1996 bagi penarafan bintang dan 1999 bagi penarafan orkid secara sukarela (*voluntary basis*).
2. Pada tahun 2010, Kementerian ini telah melaksanakan penarafan dengan menggunakan Kriteria Minimum Pengelasan Premis Pengelasan Pelancongan iaitu taraf 1-5 Bintang untuk hotel, 3-5 Bintang untuk hotel apartment dan 1-3 Orkid untuk hotel yang tidak dapat dikelaskan mengikut taraf bintang. Sehingga 30 Mei 2020, terdapat 4,889 premis penginapan pelancong telah berdaftar dengan Kementerian dan sebanyak 2,025 premis telah dikelaskan.
3. Data yang diperolehi daripada pihak persatuan-persatuan hotel yang diiktiraf oleh Kementerian ini iaitu *Malaysian Association of Hotels* (MAH), *Malaysian Association of Hotel Owners* (MAHO) dan *Malaysia Budget Hotel Association* (MyBha) menunjukkan, dalam tempoh antara 18 Mac 2020 hingga 1 Julai 2020, sebanyak 36 buah premis penginapan pelancong pelbagai taraf bintang telah menutup operasi.

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KEDUA , PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TENGKU ZULPURI BIN RAJA PUJI
[RAUB]**

TARIKH : 27 JULAI 2020 (ISNIN)

SOALAN NO. 45

Minta **MENTERI TENAGA DAN SUMBER ASLI** menyatakan status cadangan RUU Perhilitan dan RUU Perhutanan yang terkini dan bila boleh bawa ke Dewan untuk dibahaskan.

JAWAPAN

Tuan Yang di-Pertua,

1. Untuk makluman Ahli Yang Berhormat, cadangan pindaan Akta Perhutanan Negara 1984 [*Akta 313*] telah diluluskan secara prinsip oleh Jemaah Menteri pada 8 November 2019 dan Majlis Tanah Negara Ke-76 pada 4 Disember 2019. Manakala, cadangan pindaan Akta Pemuliharaan Hidupan Liar 2010 [*Akta 716*] telah diluluskan oleh Jemaah Menteri pada 8 November 2019.

2. Walau bagaimanapun, susulan pembentukan kabinet baharu Kerajaan Persekutuan pada 9 Mac 2020, Jabatan Peguam Negara telah menasihatkan agar cadangan pindaan Akta 313 dan Akta 716 perlu dikemukakan semula kepada Jemaah Menteri dan Majlis Tanah Negara untuk pertimbangan.

3. Cadangan pindaan Akta 313 telah mendapat kelulusan secara prinsip oleh Jemaah Menteri pada 6 Mei 2020 dan kini dalam proses untuk dibentangkan dalam Majlis Tanah Negara Ke-77 yang dijangka akan bermesyuarat pada bulan September 2020. Cadangan pindaan Akta 313 dijangka akan dibentangkan untuk Bacaan Pertama di Parlimen pada bulan November 2020.

4. Cadangan pindaan Akta 716 pula sedang dalam proses mendapatkan ulasan oleh Kementerian dan Agensi berkaitan untuk dibentangkan di Mesyuarat Jemaah Menteri. Cadangan pindaan Akta 716 juga dijangka akan dibentangkan untuk Bacaan Pertama di Parlimen pada bulan November 2020.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 27 JULAI 2020 (ISNIN)

SOALAN

DATIN PADUKA DR. TAN YEE KEW [WANGSA MAJU] minta **MENTERI PEMBANGUNAN WANITA, KELUARGA DAN MASYARAKAT** menyatakan sejauh manakah kejayaan di dalam pelaksanaan mengimplementasikan Pelan Strategi Kebangsaan bagi menangani punca perkahwinan bawah umur.

JAWAPAN

Tuan Yang di-Pertua,

Kerajaan komited meneruskan usaha bagi menangani punca perkahwinan bawah umur melalui pelaksanaan Pelan Strategi Kebangsaan Bagi Menangani Punca Perkahwinan Bawah Umur 2020 sehingga 2025. Pelan ini mengandungi pelbagai program dan tindakan yang akan dilaksanakan sehingga ke peringkat akar umbi untuk menangani enam faktor yang telah dikenal pasti sebagai punca perkahwinan bawah umur. Program dan tindakan yang dirancang sepanjang tempoh lima tahun pelaksanaan pelan akan mencerminkan isu-isu yang merentas pelbagai sektor seperti perundangan, keibubapaan, sistem sokongan sosial, pendidikan, kesihatan dan kesedaran.

Bagi memastikan pelaksanaan Pelan ini berjalan dengan lancar maka satu Jawatankuasa Pemandu yang dipengerusikan oleh Ketua Setiausaha Kementerian ditubuhkan untuk memantau pelaksanaan pelan serta perkembangan program dan tindakan yang telah dirancang bagi setiap strategi di bawah faktor. Selain itu, Jawatankuasa ini turut berfungsi sebagai platform untuk agensi pelaksana yang terlibat melaporkan pelaksanaan, isu dan cabaran serta cadangan penambahbaikan terhadap setiap program atau tindakan yang dilaksanakan. Jawatankuasa ini juga akan berkuat kuasa dari selama lima tahun sepanjang tempoh pelaksanaan Pelan. Mesyuarat Jawatankuasa Pemandu bilangan 1 bagi tahun 2020 juga dirancang untuk diadakan pada bulan Ogos tahun ini.

Tuan Yang di-Pertua,

Kementerian juga bercadang untuk mengadakan beberapa siri konsultasi di semua negeri mengenai cadangan kenaikan had umur perkahwinan bagi lelaki dan perempuan. Kementerian juga akan meneruskan usaha untuk mengadakan perbincangan bersama UNICEF yang tertangguh disebabkan oleh Perintah Kawalan Pergerakan (PKP). Sesi libat urus juga akan diadakan dengan melibatkan kerjasama pelbagai pihak seperti Kementerian/Jabatan Kerajaan, Ahli Akademik, pakar hak asasi kanak-kanak, Pertubuhan Bukan Kerajaan (NGO), agamawan serta wakil Kerajaan negeri Sabah dan Sarawak bersama komuniti dari etnik tertentu yang masih mengamalkan perkahwinan bawah umur melalui undang-undang adat.

Kita amat berharap supaya kerjasama dari semua pihak termasuk rakan daripada pihak pembangkang, ahli akademik, NGO dapat diteruskan sebagai rakan strategik bersama Kementerian dalam mengekang perkahwinan bawah umur ini dan seterusnya merealisasikan potensi penuh kanak-kanak di negara ini.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN TEH KOK LIM [TAIPING]

TARIKH : 27 JULAI 2020 (ISNIN)

SOALAN

TUAN TEH KOK LIM [TAIPING] minta **MENTERI KOMUNIKASI DAN MULTIMEDIA** menyatakan usaha Kerajaan dalam pengawalan caj perkhidmatan Telco dan tahap perkhidmatan yang dibekalkan khasnya di kawasan luar bandar.

JAWAPAN

Tuan Yang Dipertua,

1. Untuk makluman Ahli Yang Berhormat, kadar pakej jalur lebar tetap, jalur lebar tanpa wayar dan jalur lebar mudah alih ditentukan oleh faktor-faktor pasaran, perlindungan pengguna dan keadaan ekonomi semasa. Persaingan secara sihat di kalangan penyedia perkhidmatan komunikasi di Malaysia mewujudkan ekosistem industri telekomunikasi yang lebih mampan dan dapat memberikan faedah terbaik kepada rakyat. Walau bagaimanapun, Suruhanjaya Komunikasi dan Multimedia (SKMM) sentiasa memantau harga untuk pakej jalur lebar tetap dan jalur lebar mudah alih prabayar dan pascabayar bagi menjaga kebajikan rakyat di seluruh negara termasuk di kawasan luar bandar.
2. Di bawah Akta Komunikasi dan Multimedia 1998 (AKM98), terdapat beberapa mekanisme melalui mana Kerajaan dapat memastikan caj perkhidmatan yang dikenakan adalah berpatutan dan mampu milik.
3. Selain daripada itu, SKMM juga boleh menggunakan instrumen perundangan seperti standard mandatori untuk meningkatkan persaingan sebagai contoh Standard Mandatori mengenai Harga Capaian (*Mandatory Standard on Access Pricing* atau MSAP) yang membolehkan pemberi perkhidmatan memperoleh harga borong yang lebih rendah. Dengan harga yang lebih rendah, mereka boleh menawarkan pakej runcit baharu kepada pengguna pada harga mampu milik yang lebih berdaya saing (*competitive*).
4. Untuk makluman YB jua, harga untuk perkhidmatan syarikat telekomunikasi di Malaysia adalah berpatutan. Untuk perkhidmatan jalur lebar tetap berkelajuan tinggi, Telekom Malaysia (TM) menawarkan pakej asas iaitu 30Mbps pada harga RM79 sebulan (harga sebelum SST). Harga pakej 30Mbps di Malaysia adalah paling rendah jika dibandingkan dengan pakej yang sama di negara-negara lain di rantau ASEAN.

SOALAN NO : 50

5. Manakala, harga pakej perkhidmatan mudah alih di Malaysia adalah kompetitif kerana terdapat pelbagai pakej dan perkhidmatan nilai tambah yang ditawarkan. Pengguna boleh menikmati perkhidmatan mudah alih dengan harga serendah RM8. Tambahan pula, pada masa ini, pembekal perkhidmatan mudah alih utama turut menawarkan sehingga 30GB sebulan secara percuma (1GB data harian) mulai 1 April 2020 hingga 31 Disember 2020.
6. Dengan adanya pelbagai plan yang ditawarkan pada kadar harga yang berpatutan, pengguna bukan sahaja boleh memilih pemberi perkhidmatan mereka, malahan dengan adanya *Mobile Number Portability*, pengguna boleh menukar pemberi perkhidmatan mereka dengan mudah untuk mendapatkan pakej yang lebih kompetitif.
7. Jelas, terdapat pelbagai pilihan untuk pakej jalur lebar tetap dan jalur lebar mudah alih mengikut kemampuan kewangan pengguna. SKMM sentiasa komited bagi memantau pakej dan harga yang ditawarkan kepada pengguna bagi memastikan pengguna dapat menikmati kelajuan yang lebih tinggi pada harga yang berpatutan.
8. Instrumen perundangan juga digunakan untuk memastikan tahap perkhidmatan yang dibekalkan adalah memuaskan seperti Standard Mandatori bagi Kualiti Perkhidmatan (MSQoS), yang mana kegagalan untuk mematuhi akan dikenakan tindakan oleh SKMM.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KEDUA , PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG HON WAI [BUKIT BENDERA]

TARIKH : 27 JULAI 2020 (ISNIN)

SOALAN NO. 51

Minta **MENTERI TENAGA DAN SUMBER ASLI** menyatakan statistik spesies haiwan yang terancam di Malaysia dan adakah pihak Kementerian akan meluaskan kuasa Jabatan Perlindungan Hidupan Liar dan Taman Negara (PERHILITAN) untuk melindungi spesies terancam dan apakah dasar dan langkah yang telah dilaksanakan untuk menambah baik usaha tersebut.

JAWAPAN

Tuan Yang di-Pertua,

Mengikut data yang direkodkan di dalam *Red List of Mammals for Peninsular Malaysia*, sehingga penghujung tahun 2017, terdapat satu

spesies yang telah disenaraikan sebagai pupus atau *extinct* iaitu Badak Jawa, manakala empat (4) spesies lagi dinilai sebagai amat terancam atau *critically endangered* iaitu Badak Sumatera, Harimau Malaya, Tenggiling dan Banteng. Selain itu, sebanyak 12 spesies dinilai sebagai terancam (*endangered*) sementara 14 spesies dinilai sebagai terdedah kepada ancaman (*vulnerable*), 33 spesies hampir merbahaya (*near threatened*), 83 spesies kurang membimbangkan (*least concern*) dan 76 spesies berstatus kurang data (*data deficient*).

Kementerian Tenaga dan Sumber Asli (KeTSA) melalui Jabatan Perlindungan Hidupan Liar dan Taman Negara (PERHILITAN) sangat komited dalam melindungi hidupan liar supaya tidak pupus. Antara usaha-usaha yang dijalankan ialah:

- (i) mewujudkan kawasan perlindungan (*protected areas*) seperti Taman Negara dan rezab hidupan liar bagi keliaran hidupan liar di habitat semula jadi;
- (ii) mewujudkan rangkaian koridor ekologi bagi membolehkan pergerakan hidupan liar;
- (iii) meminda Akta Pemuliharaan Hidupan Liar 2010 [*Akta 716*] bagi mengenakan hukuman denda yang lebih berat untuk kesalahan menceroboh kawasan rizab dan perlakuan zalim terhadap hidupan liar;

- (iv) meningkatkan rondaan penguatkuasaan di dalam dan luar kawasan perlindungan menerusi program Operasi Bersepadu Khazanah dan *Biodiversity Protection and Patrolling Programme* (BP3) dengan kerjasama pelbagai agensi penguatkuasaan termasuk Angkatan Tentera Malaysia (ATM), Polis Diraja Malaysia (PDRM), Jabatan Perhutanan Semenanjung Malaysia (JPSM), Perbadanan Taman Negara Johor (PTNJ), Perbadanan Taman Negeri Perak (PTNP) dan pertubuhan bukan kerajaan (NGO);
- (v) menjalankan program penguatkuasaan dengan agensi penguatkuasaan antarabangsa seperti International Police (INTERPOL) bagi memastikan semua hidupan liar yang terancam dilindungi daripada penyeludupan dan dieksploitasi secara tidak terkawal;
- (vi) melantik Veteran Angkatan Tentera Malaysia (VAT) dan Orang Asli sebagai renjer hidupan liar secara *Contract for Service* (CFS) bagi meningkatkan penguatkuasaan;
- (vii) melaksanakan Pelan Konservasi Gajah Kebangsaan 2013-2022 (NECAP) dan Pelan Tindakan Pemuliharaan Harimau Kebangsaan 2008-2020 (NTCAP);
- (viii) menjalankan program konservasi hidupan liar secara *ex-situ* melalui pembiakan di dalam kurungan untuk menyediakan stok hidupan liar bagi program pelepasan semula ke habitat semula jadi. Antara

NO. SOALAN : 51

spesies yang berjaya dibiak dan dilepaskan ke habitat semula jadi adalah seladang, Tapir Malaya, rusa, kijang dan Burung Kuang;

- (ix) bekerjasama dengan Kerajaan-kerajaan Negeri untuk membangunkan kawasan-kawasan santuari seperti *Johor Elephant Sanctuary* (JES) dan *Perak Elephant Sanctuary* (PES); dan
- (x) menjalankan program *Communication, Education dan Public Awareness* (CEPA) secara berterusan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN SYED IBRAHIM BIN SYED NOH
[LEDANG]**

TARIKH : 27 JULAI 2020 (ISNIN)

SOALAN

TUAN SYED IBRAHIM BIN SYED NOH [LEDANG] minta **MENTERI KOMUNIKASI DAN MULTIMEDIA** menyatakan data dan statistik berkaitan kes isu jenayah penipuan siber sepanjang tempoh penguatkuasaan Perintah Kawalan Pergerakan (PKP).

JAWAPAN

Tuan Yang Dipertua,

1. Untuk makluman Ahli Yang Berhormat, kegiatan penipuan ataupun 'scam' sama ada secara dalam talian ataupun luar talian adalah tertakluk di bawah bidang kuasa pihak Polis Diraja Malaysia (PDRM), Kementerian Perdagangan Dalam Negeri dan Hal Ehwal Pengguna (KPDNHEP), Bank Negara Malaysia (BNM) atau agensi-agensi berkenaan; tertakluk kepada bentuk-bentuk penipuan yang dijalankan.
2. Walau bagaimanapun, Kementerian ini melalui Pusat Bantuan Cyber999, telah menerima laporan insiden berkaitan jenayah penipuan siber sepanjang tempoh penguatkuasaan Perintah Kawalan Pergerakan (PKP) iaitu bagi tempoh 18 Mac - 30 Jun 2020 seperti berikut:

Bil.	Keterangan	Statistik
1.	<i>Fraud – Counterfeit Item</i>	1
2.	<i>Fraud – Domain Dispute</i>	2
3.	<i>Fraud – Fraud Purchase</i>	161
4.	<i>Fraud – Fraud Site</i>	8
5.	<i>Fraud – Illegal Investment</i>	23
6.	<i>Fraud – Impersonation and Spoofing</i>	21
7.	<i>Fraud – Job Scam</i>	5
8.	<i>Fraud – Lottery Scam</i>	3
9.	<i>Fraud – Online Scam</i>	298
10.	<i>Fraud - Phishing</i>	2,413
11	<i>Fraud – Unauthorized Transaction</i>	17
Jumlah		2,952

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : TUAN HASSAN BIN ABDUL KARIM
[PASIR GUDANG]
TARIKH : 27 JULAI 2020 (ISNIN)

SOALAN

Minta **MENTERI PENDIDIKAN** menyatakan apakah pendirian sebenar Kementerian tentang pelaksanaan dasar Pengajaran dan Pembelajaran Sains dan Matematik dalam Bahasa Inggeris (PPSMI).

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia tidak berhasrat untuk memperkenalkan semula dasar Pengajaran dan Pembelajaran Sains dan Matematik dalam Bahasa Inggeris (PPSMI).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN SYED IBRAHIM SYED NOH
[LEDANG]**

TARIKH : 27 JULAI 2020 (ISNIN)

SOALAN

TUAN SYED IBRAHIM BIN SYED NOH [LEDANG] minta **MENTERI KOMUNIKASI DAN MULTIMEDIA** menyatakan langkah yang diambil Kementerian bagi membangunkan liputan dan kesalinghubungan yang lebih efektif, meluas dan menyentuh semua golongan masyarakat.

JAWAPAN

Tuan Yang di-Pertua,

1. Untuk makluman Ahli Yang Berhormat, Pihak Kerajaan telah melaksanakan projek Jalur Lebar Pinggir Bandar (SUBB) dan projek Jalur Lebar Luar Bandar (RBB) yang menyediakan kemudahan jalur lebar berkelajuan tinggi di kawasan pinggir bandar dan luar bandar di seluruh negara. Lebih daripada 636 ribu sambungan telah tersedia melibatkan penaiktarafan 584 ibu sawat di seluruh negara, manakala sebanyak lebih 34 ribu sambungan masih dalam peringkat pelaksanaan yang dijangka siap secara berperingkat pada tahun 2020.
2. Pihak Kerajaan juga turut melaksanakan inisiatif penyediaan perkhidmatan selular awam yang melibatkan pembinaan menara komunikasi baharu dan penaiktarafan alat pemancar komunikasi di menara komunikasi sedia ada di seluruh negara. Sehingga kini sebanyak 2,332 menara komunikasi baharu telah siap dibina manakala 803 menara masih dalam peringkat pelaksanaan di seluruh negara.
3. Selain itu, sebanyak 5,332 alat pemancar komunikasi di menara komunikasi sedia ada telah dinaiktaraf kepada perkhidmatan 3G dan 4G manakala 24 alat pemancar komunikasi masih dalam peringkat pelaksanaan di seluruh negara.
4. Di samping itu, bagi tahun 2020, sebanyak 102,384 premis talian tetap telah dinaik taraf kepada rangkaian gentian optik manakala bagi rangkaian mudah alih pula, 3,098 alat pemancar komunikasi telah dinaik taraf secara komersial oleh pemberi perkhidmatan.
5. Pelaksanaan kesemua inisiatif ini telah menyumbang kepada peningkatan kepada liputan jalur lebar mudah alih di kawasan berpenduduk di seluruh negara, iaitu 95.32% bagi liputan 3G dan 88.96% bagi liputan 4G/LTE, setakat suku pertama 2020.
6. Pada masa ini, Kementerian sedang mengadakan sesi perbincangan bersama pihak industri untuk memantapkan kualiti dan liputan perkhidmatan di seluruh negara.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI HASANUDDIN BIN MOHD
[HULU LANGAT]**

TARIKH : 27 JULAI 2020 (ISNIN)

SOALAN

Minta **MENTERI PENGAJIAN TINGGI** menyatakan apakah Kementerian akan menambah dana penyelidikan di IPTA untuk pembangunan kajian perikanan yang menjadi salah satu sumber utama makanan rakyat.

JAWAPAN

Tuan Yang di-Pertua,

Kementerian Pengajian Tinggi (KPT) sentiasa memberikan keutamaan kepada geran-geran penyelidikan yang berbentuk pemindahan pengetahuan (*knowledge transfer*) dan memberi impak kepada pihak berkepentingan, termasuklah yang melibatkan kajian perikanan yang berkait rapat dengan kepentingan rakyat. Makanan laut terutamanya ikan merupakan sumber protein yang sangat penting dalam diet rakyat Malaysia.

Mengambil kira kepentingan ini, pihak KPT telah membiaya projek-projek yang berkaitan dengan perikanan sejak tahun 2011. Lebih dari 100 projek telah diluluskan di bawah dana penyelidikan KPT berkaitan perikanan dan akuakultur. Topik-topik berkaitan perikanan yang telah diluluskan di bawah dana penyelidikan KPT merangkumi bidang teknologi makanan, pemprosesan produk, bioteknologi perikanan, kejuruteraan akuakultur, kesihatan organisma akuatik, rekabentuk dan sistem akuatik, ekologi akuatik serta lain-lain topik berkaitan.

Geran yang diperuntukan oleh KPT adalah mencukupi untuk semua jenis penyelidikan termasuk bidang perikanan. KPT akan memastikan IPT-IPT yang mempunyai bidang tujahan yang bersesuaian untuk meningkatkan tahap penyelidikan mereka khususnya dalam bidang perikanan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN LIM KIT SIANG

TARIKH : 27 JULAI 2020 (ISNIN)

SOALAN

TUAN LIM KIT SIANG [ISKANDAR PUTERI] minta **MENTERI KOMUNIKASI DAN MULTIMEDIA** menyatakan rancangan siber Kerajaan terutamanya dalam menangani masalah berita palsu yang terus-menerus memburukkan hubungan di antara masyarakat pelbagai kaum dan agama di negara kita berserta dengan langkah-langkah yang diambil untuk mengatasinya.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian Komunikasi dan Multimedia Malaysia (KKMM) melalui Jabatan Penerangan Malaysia (JaPen) sentiasa melaksanakan hebahan maklumat yang sahih dalam memberi penjelasan untuk memupuk perpaduan dan mengatasi masalah polemik perkauman yang kian meruncing.
2. Di samping itu, JaPen turut melaksanakan perkongsian maklumat untuk mendidik masyarakat supaya menyemak dan memastikan kesahihan maklumat yang diterima sebelum dikongsi di media sosial.
3. Sejak Januari hingga Jun 2020, sebanyak 203 hantaran (*posting*) mengenai berita palsu telah dimuat naik merangkumi infografik, video dan kenyataan media daripada Pertubuhan Berita Nasional Malaysia (BERNAMA), RTM dan Agensi-agensi Kerajaan yang lain di media sosial rasmi JaPen (*Facebook, Instagram, Twitter, Youtube*). JaPen turut menghasilkan sebanyak 19 infografik bagi tempoh tersebut.

4. KKMM melalui Pasukan Respons Pantas (PRP) menjalinkan kerjasama strategik di antara KKMM dan jabatan/agensi Kerajaan yang dianggotai oleh pegawai-pegawai KKMM, Majlis Keselamatan Negara (MKN), Suruhanjaya Komunikasi dan Multimedia Malaysia (SKMM), BERNAMA dan JaPen.
5. Secara dasarnya, PRP KKMM ditugaskan untuk menangani berita palsu sebagai contoh dakwaan jangkitan COVID-19 melibatkan Kementerian Kesihatan Malaysia (KKM), Perintah Kawalan Pergerakan (PKP), Perintah Kawalan Pergerakan Diperketatkan (PKPD), Perintah Kawalan Pergerakan Bersyarat (PKPB) dan Pakej Rangsangan Ekonomi Prihatin Rakyat (PRIHATIN). Ini kerana isu-isu yang dinyatakan menarik perhatian rakyat dan berpotensi memberi impak negatif menimbulkan keresahan di kalangan rakyat sekiranya tidak ditangani lebih awal sehingga memungkinkan berlakunya insiden-insiden yang tidak diingini seperti *panic buying* dan rusuhan seperti yang berlaku di luar negara.
6. PRP KKMM beroperasi untuk memantau setiap saluran media sosial secara menyeluruh meliputi *Facebook*, *Twitter*, *Instagram*, *Telegram* dan aplikasi *WhatsApp*. Seterusnya, isu-isu yang dikenalpasti belum ditentukan kesahihan akan dikemukakan kepada kementerian / jabatan / agensi yang berkaitan mengikut Prosedur Operasi Standard (SOP) PRP KKMM yang telah ditetapkan untuk mendapatkan pengesahan dan maklumbalas. Komunikasi dua hala antara PRP KKMM bersama pegawai kementerian / jabatan / agensi berkaitan bagi mendapatkan pengesahan kesahihan terhadap sesuatu isu kebiasaannya mengambil masa minimum selama 30 minit dan maksimum sehingga 3 jam.
7. Setelah mendapat pengesahan bagi isu yang dikenalpasti, draf penafian berita palsu dikenali sebagai 'Pemakluman Berita Palsu' akan disediakan dalam kadar segera dan disiarkan mengikut waktu siaran yang ditetapkan. Walau bagaimanapun, terdapat juga siaran khas bagi isu kritikal dan *ad hoc* sekiranya menerima arahan daripada Pejabat Perdana Menteri (PMO). Sehingga 5 Julai 2020, sebanyak 347 penafian berita palsu telah diperjelaskan kepada masyarakat.

8. Suruhanjaya Komunikasi dan Multimedia Malaysia (SKMM) juga turut melancarkan Kempen 'Kebebasan Bersuara bukan Kebebasan Berbohong' (*The Truth Campaign*) bagi tempoh tiga (3) bulan bermula 10 Julai 2020 bagi mencegah penularan penyebaran berita palsu..
9. Tujuan kempen ini adalah untuk mewujudkan kesedaran serta mendidik rakyat supaya tidak melanggar batasan kebebasan bersuara yang diberikan sehingga boleh mencetuskan kekeliruan di khalayak ramai.
10. Kempen ini dimulakan dengan pelbagai artikel diterbitkan dalam surat khabar dan temuramah di stesen-stesen televisyen. Pihak SKMM juga telah menyediakan beberapa poster kempen untuk dikongsi dan dimuatnaik di laman media sosial yang menekankan pelbagai etika berkaitan kebebasan bersuara seperti bijak menilai, bercakap benar, beringat bila bercakap dan sebagainya.
11. Selain itu, fakta Penafian Berita Palsu turut dibacakan oleh Menteri Kanan (Kluster Keselamatan) semasa Sidang Media Harian *Non-Health* yang disiarkan secara langsung di saluran televisyen, paparan infografik di RTM, BERNAMA, Portal Sebenarnya.my, telegram rasmi MKN, *crawler* televisyen dan radio di samping menjadi sumber utama yang dikongsikan di media sosial rasmi kementerian/jabatan/agensi dan orang awam di seluruh negara.
12. Akhir sekali, ianya adalah menjadi tanggungjawab bersama untuk terus mendidik masyarakat akan cara menggunakan kebebasan bersuara yang sedia ada secara berhemah tanpa menyebarkan penipuan dan maklumat palsu.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : DATUK DR. HASAN BIN BAHROM [TAMPIN]

TARIKH : 27 JULAI 2020 (ISNIN)

SOALAN

Minta **MENTERI PENGANGKUTAN** menyatakan apakah ada dasar yang konkrit dalam menangani masalah penjualan minuman keras di dalam penerbangan Malaysia, apakah Kerajaan berhasrat untuk menguatkuasakan larangan hidangan atau penjualan minuman keras dalam sistem penerbangan Malaysia. Jika ya, bila ia akan dikuatkuasakan.

JAWAPAN

Yang Dipertua,

Untuk makluman Yang Berhormat, isu berhubung hidangan arak dalam pesawat MAS telah dibangkitkan bermula tahun 2011. Secara ringkasnya, adalah menjadi pendirian Kerajaan untuk tidak menghalang sebarang cadangan untuk menghentikan hidangan arak dalam semua penerbangan MAB. Walau bagaimanapun, pelaksanaannya adalah merupakan keputusan komersial syarikat penerbangan.

Syarikat Penerbangan Malaysia Berhad (MAB) sebagai sebuah syarikat penerbangan yang beroperasi ke pelbagai destinasi di seluruh dunia dengan pelbagai lapisan penumpang perlu memenuhi kehendak penumpang khususnya penumpang kelas perniagaan dan kelas pertama yang mana sudah menjadi kelaziman bagi kebanyakan syarikat penerbangan di dunia untuk menyediakan hidangan arak kepada penumpang.

Sungguhpun demikian, ini tidak bermakna kerajaan dan MAB menggalakkan penumpangnya untuk mengambil minuman keras. Dalam hubungan ini, mulai 1 Januari 2016, MAB tidak lagi menyediakan hidangan arak untuk penerbangan di bawah 3 jam perjalanan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHA KEE CHIN [RASAH]

TARIKH : 27 JULAI 2020 (ISNIN)

SOALAN

Minta **MENTERI PENDIDIKAN** menyatakan status terkini kajian yang telah dilakukan oleh Jawatankuasa Khas Pengumpulan Maklum Balas Pengiktirafan UEC. Sama ada pihak Kementerian Pendidikan atau Jemaah Menteri telah mempertimbangkan hasil kajian tersebut dan bilakah pengiktirafan UEC akan diumumkan.

JAWAPAN

Tuan Yang di-Pertua,

Kementerian Pendidikan Malaysia (KPM) telah menubuhkan Pasukan Petugas Dasar *Unified Examination Certificate* (PPDUEC) pada 29 Ogos 2018 untuk mengkaji isu pengiktirafan sijil UEC sebagai syarat am kelayakan untuk memasuki institusi pengajian tinggi awam (IPTA). Pelantikan tiga orang ahli PPDUEC telah dibuat oleh YB Menteri Pendidikan pada ketika itu dan mula menjalankan tugas mulai 29 November 2018.

Berdasarkan Terma Rujukan, PPDUEC diberi tempoh tiga hingga enam bulan untuk mengemukakan laporan kajian kepada KPM. Walaupun tempoh kajian telah dilanjutkan sehingga 16 bulan, dengan enam kali pelanjutan tempoh kajian, iaitu sehingga Februari 2020, PPDUEC masih gagal menyerahkan laporan kajian berkenaan. Memandangkan tempoh kajian tidak dilanjutkan dan telah tamat pada 29

Februari 2020, maka keanggotaan PPDUEC juga tamat secara automatik pada tarikh yang sama, iaitu 29 Februari 2020.

Untuk makluman ahli Yang Berhormat, sehingga kini KPM tidak pernah menerima sebarang laporan awal, deraf laporan atau laporan lengkap daripada PPDUEC, sepertimana yang ditetapkan semasa pelantikan dibuat. Oleh demikian, tiada sebarang hasil kajian dapat diperhalusi dan diteliti oleh KPM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : DATO' SERI DR. WAN AZIZAH WAN ISMAIL [PANDAN]

TARIKH : 27 JULAI 2020 (ISNIN)

SOALAN

DATO' SERI DR. WAN AZIZAH WAN ISMAIL [PANDAN] minta **MENTERI KOMUNIKASI DAN MULTIMEDIA** menyatakan apakah polisi, strategi dan langkah-langkah Kementerian untuk menangani masalah buli siber yang semakin berleluasa yang boleh memberikan kesan yang tragis ke atas mangsa, seperti kes seorang remaja wanita di Pulau Pinang pada bulan Mei 2020.

JAWAPAN

Tuan Yang Dipertua,

1. Untuk makluman Ahli Yang Berhormat, buli siber merupakan satu ancaman siber yang perlu diberi perhatian oleh semua pihak, terutamanya di kalangan pengguna media sosial. Kawalan sendiri atau *self-regulation* dengan membudayakan penggunaan internet secara positif berteraskan 3 aspek iaitu keselamatan, kewaspadaan dan tanggungjawab oleh pengguna media sosial adalah penting penting bagi melindungi diri sendiri dan juga masyarakat sekeliling daripada paparan kandungan-kandungan berbentuk negatif.

2. Bagi menangani isu ini, Kementerian berkolaborasi dengan Universiti Multimedia (MMU) untuk menjalankan penyelidikan berkaitan undang-undang antibuli siber. Kementerian juga bersetuju untuk

bekerjasama dengan MMU untuk melaksanakan kempen literasi tentang kesedaran mengenai hak pengguna media digital di Malaysia.

3. Selain itu, Kerajaan turut menggerakkan program kesedaran dan pendidikan bagi memupuk budaya penggunaan secara bijaksana dan berhemah dalam kalangan pengguna media sosial. Program CyberSAFE (*Cyber Security Awareness For Everyone*), Modul Kesedaran Keselamatan Siber Nasional (MKKSN) dan program advokasi seperti Klik dengan Bijak (KDB), Hentikan Buli Siber dan Berita Palsu giat dilaksanakan bagi mewujudkan masyarakat Malaysia yang bertanggungjawab.

4. Untuk makluman Ahli Yang Berhormat juga, pihak Suruhanjaya Komunikasi dan Multimedia Malaysia (SKMM) tidak mempunyai keupayaan untuk menyekat mana-mana akaun media sosial kerana mempunyai limitasi serta kekangan dari sudut teknikal. Ini adalah kerana sekatan ke atas mana-mana akaun media sosial (contohnya Facebook) secara teknikal akan menyebabkan sekatan terhadap keseluruhan laman sosial yang berkenaan (Facebook).

5. Tindakan yang dijalankan adalah lebih berupa rundingan melalui saluran *Law Enforcement Request* (LE request) dengan izin, bagi setiap satu kandungan yang dipohon sekatan akses tempatan, atau pemadaman atau penyingkiran kandungan atau akaun secara kekal. Walau bagaimanapun, tindakan dan kerjasama yang diberi adalah tertakluk kepada terma dan syarat perkhidmatan serta piawaian komuniti penyedia platform.

6. Selain maklumat daripada pengguna media sosial, pihak penyedia platform media sosial seperti Facebook juga turut memantau kandungan serta akaun yang terdapat di platform mereka, dan akan mengambil tindakan sewajarnya sekiranya kandungan atau akaun yang dimuatnaik bertentangan dengan terma dan syarat serta piawaian komuniti. **Walaupun bagaimanapun, terma dan syarat piawaian komuniti tersebut adalah ditetapkan oleh pihak penyedia platform media sosial tersebut.**

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN WONG SHU QI [KLUANG]

TARIKH : 27 JULAI 2020

SOALAN

minta **MENTERI KOMUNIKASI DAN MULTIMEDIA** menyatakan butiran berkenaan Geran Automasi Pintar sejumlah RM100 juta di bawah PENJANA seperti berikut :

- a. sama ada geran ini sama dengan geran automasi pintar yang telah diumumkan dalam Belanjawan 2020; dan
- b. sekiranya dua geran adalah projek yang sama, jelaskan kenapa peruntukan dikurangkan untuk projek tersebut.

JAWAPAN

Tuan Yang di-Pertua,

1. Untuk makluman Ahli Yang Berhormat, *Malaysia Digital Economy Corporation* (MDEC) iaitu agensi di bawah Kementerian Komunikasi dan Multimedia (KKMM) telah diberi peruntukan sebanyak RM10 juta daripada jumlah RM100 juta bagi tahun 2020 untuk mengurus Geran Automasi Pintar atau *Smart Automation Grant* (SAG) di bawah PENJANA.
2. Geran Automasi Pintar yang diuruskan oleh MDEC ini merupakan bantuan kewangan dan bentuk geran padanan untuk syarikat-syarikat perkhidmatan mengautomasikan proses dan operasi perniagaan mereka

dengan penggunaan teknologi digital. Inisiatif ini bertujuan untuk menggalakkan syarikat tempatan untuk memanfaatkan teknologi digital untuk meningkatkan produktiviti serta mengurangkan kos operasi dan kebergantungan kepada proses manual. Mekanisme pelaksanaan Geran ini melibatkan kerjasama institusi kewangan dan rakan industri seperti syarikat telekomunikasi dan pakar industri.

3. Geran Automasi Pintar yang diperuntukkan kepada MDEC ini adalah sebahagian daripada jumlah keseluruhan peruntukan sebanyak RM550 juta untuk tempoh lima tahun yang diumumkan semasa Bajet 2020.

4. Namun begitu, maklumat lebih lengkap mengenai butiran dan peruntukan keseluruhan Geran Automasi Pintar yang berjumlah RM550 juta yang diumumkan semasa Bajet 2020 adalah dikawal selia oleh Kementerian Kewangan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DATO' NGEH KOO HAM [BERUAS]

TARIKH : 27 JULAI 2020

SOALAN

Minta **MENTERI PERTANIAN DAN INDUSTRI MAKANAN** menyatakan syarikat-syarikat yang dibenarkan untuk mengimport beras dan adakah Kementerian berhasrat membenarkan beras diimport secara bebas supaya harga beras di Malaysia lebih mencerminkan harga pasaran dunia.

JAWAPAN

Tuan Yang Dipertua,

1. Untuk makluman Ahli Yang Berhormat, pada masa ini pengimportan beras bagi menampung kekurangan kira-kira 30% penggunaan beras dalam negara hanya dilaksanakan oleh BERNAS selaku pemegang konsesi selari dengan Dasar *Single-Gate Keeper* Kerajaan bertujuan bagi mengawal komoditi strategik negara. Dasar ini secara timbal balik memberi manfaat kepada Kerajaan di mana fungsi sebagai pengimport tunggal juga mensyaratkan BERNAS melaksanakan lima obligasi sosial dengan kos tertentu dalam mengurus industri padi dan beras negara.
2. Sepanjang pelaksanaan Dasar *Single- Gate Keeper* ini juga, syarikat-syarikat lain yang berminat untuk turut terlibat dalam pembekalan dan pemasaran beras import dalam negara adalah dibenarkan melalui bekalan beras yang disediakan oleh BERNAS. Pada masa ini terdapat 1,484 syarikat pemborongan aktif yang berdaftar dengan Kementerian.
3. Berhubung dengan cadangan untuk membuka bebas pengimportan beras, Kerajaan perlu memperhalusi cadangan tersebut bagi memastikan pelaksanaannya tidak akan menjejaskan pelbagai pihak yang berkepentingan dalam industri seperti petani, pengilang, pemborong, peruncit, kerajaan dan pengguna. Berdasarkan dasar semasa, harga runcit beras putih import adalah lebih murah berbanding dengan dengan negara ASEAN lain serta di peringkat antarabangsa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 27 JULAI 2020 (ISNIN)

SOALAN

Minta **MENTERI PENDIDIKAN** menyatakan status pembinaan SJKC Poay Chai, Johor sama ada KPM telah meluluskan Jawatankuasa Pembinaan Sementara untuk menukar brif projek daripada 36 bilik darjah kepada 48 bilik darjah dan (2) sama ada Kerajaan akan membayar kos pembinaan.

JAWAPAN

Tuan Yang di-Pertua,

Untuk makluman Ahli Yang Berhormat, SJKC Poay Chai adalah berstatus sekolah bantuan kerajaan (SBK). Pada 26 Oktober 2017, Kementerian Pendidikan Malaysia (KPM) telah meluluskan permohonan untuk memindahkan lokasi SJKC ini dari lokasi asal di Kedah ke lokasi baharu di Taman Bukit Indah 2, Mukim Pulai, Johor Bahru, Johor. Ini adalah selaras dengan salah satu daripada strategi di bawah Pelan Hala Tuju Sekolah Kurang Murid (SKM), KPM supaya SKM berpindah ke lokasi lain yang berpotensi untuk berlakunya peningkatan enrolmen murid.

KPM telah menerima permohonan berhubung cadangan pembinaan SJKC ini di Johor dengan skop 36 bilik darjah dan kemudahan lain daripada Jawatankuasa Pembinaan Sementara SJKC Poay Chai. Permohonan ini telah dihantar melalui Jabatan Pendidikan Negeri Johor pada 29 Ogos 2019 dan telah diluluskan oleh KPM pada 6 Januari 2020.

Walau bagaimanapun, pembinaan sekolah tersebut masih belum dilaksanakan.

Untuk makluman Ahli Yang Berhormat, sehingga kini KPM tidak pernah menerima sebarang permohonan rasmi daripada Jawatankuasa Pembinaan Sementara SJKC Poay Chai berhubung cadangan perubahan skop projek daripada 36 bilik darjah kepada 48 bilik darjah.

Untuk makluman Ahli Yang Berhormat juga, KPM tidak menyediakan peruntukan untuk pembinaan mana-mana sekolah yang berstatus sekolah bantuan kerajaan. Dalam hal SJKC ini, Jawatankuasa Pembinaan Sementara SJKC Poay Chai adalah bertanggungjawab untuk menyediakan dana yang mencukupi bagi membiayai kos pembinaan sekolah berkenaan.

Sekian, terima kasih.